

SERENISSIMI
IACOBI AN.
GLIÆ REGIS.

APOLOGIÆ, ET MO-
NITORIÆ PRÆFATIONIS
*ad Imperatorem, Reges &
Principes;*

REFUTATIO.


Authore

MARTINO BECANO
SOCIETATIS IESV
Theologo.



MOGVNTIÆ,
Typis IOHANNIS ALBINI.

M. DC. X.





IMPERATORI,
REGIBVS, ET PRIN-
CIPIBVS CHRI-
STIANIS,

Martinus Becanus.




ICEAT mihi, *Inui-
ctissime Imperator,
Serenissimi Reges, Il-
lustrissimi Principes;*
liceat mihi, inquam, priuato ho-
mini, Vos Christiani orbis He-
roës, paucis interpellare. Spon-
deo, non fore me importunum.
Prodiit, non ita pridem, *Serenis-
simi Regis Anglia Apologia*, cum

monitoria Prefatione, Vestro Sacratissimo Nomini inscripta & dedicata. In eâ, duo potissimum persuadere conatur Rex. Vnum, vt abiuratâ Romani Pontificis authoritate, Vos Ipsi in vestris Imperiis, regnis & prouinciis, Ecclesiæ Primatum vsurpetis. Alterum, vt deserta Fide ac religione, in qua nati & educati estis, aliam, in qua ipse est, amplectamini. De prudentiâ, qua id facit, non disputo. De euentu certè, quem ipse sperat, ausim polliceri, frustra illum laborate. Vosne eâ ætate, consilio, constantiâ, Viros Principes, tam facilè permouendos, vt subitò ad aliud vitæ ac sectæ institutum
pro-

proruatis, verisimile sit? Vos, qui
 haftenus, Maiorum Vestrorum
 Exemplo, Ecclesiæ Romanæ a-
 cerrimi Defensores, non sine
 immortalis Nominis Vestri glo-
 riâ, fuistis; mox, vnius, Regis
 quidem, sed tamen hominis im-
 pulsu, mutatâ sententiâ, eandem
 oppugnatu-ros, sperare quis au-
 deat? Absit. Nec mihi proposi-
 tum est, hortari Vos, ut in fide &
 officio persistatis. Sponte vestrâ
 facturi id estis. Hoc tantum a-
 gam, ut omnes intelligant, recte-
 ne, an secus, de Primatu Eccle-
 siæ sentiat Serenissimus Rex.
 Quæso pro Vestrâ Clementiâ, æ-
 qui boniq; laborem hunc meum
 consulite.

LECTORI.


CHRISTIANE Lector.
 Serenissimus Angliæ
 Rex (quod verè, sed ve-
 recundè dico) apertum indicit bel-
 lum Pontifici & Ecclesiæ. Ego,
 tametsi Regiæ Maiestati impar
 (impar, inquam, dignitate, non
 causâ) hanc iniuriam propulsa-
 tum eo. Non tamen meâ sponte.
 Qui ausim, tam parvis viribus?
 Authoritate, exemplo, ratione
 impulsus sum, ut velim. Excita-
 runt me Viri magni, & coram, &
 per litteras. Eorum hortatorem
 tantam aggredi ausus sum. Nec
 sine Exemplo. Olim contra Iulia-
 num Imperatorem Gregorius
 Nazianzenus, & Cyrillus Ale-
 xandri

*xandrinus; contra Constantium,
 Hilarius & Lucifer Calaritanus,
 magno Catholicorum bono, se op-
 posuerunt. Cur modo, in simili cau-
 sâ, contra Regem Iacobum, non
 liceat? Imo necesse est. Quid enim?
 Ecclesia; fidelium Mater, aperto
 Matre impetitur. Hostis poten-
 tissimus est. Reges & Principes in
 belli societatem sollicitantur. Sub-
 diti perplexi sunt. Ingens omnino
 periculum est. Nos interea otiosi ac
 ignavi Spectatores ut simus? Dede-
 cus sit. Arma spiritalia corripienda
 sunt. Ecclesiæ succurrendum: Re-
 ligio conseruanda. Atq; utinam
 multi sint, qui Zelo diuino excitati
 id faciãt, Ego, quod potero, confer-
 re paratus sum. Tu beneuole Le-
 ctor, benè, ut interpreteris, velim.*



SERENISSIMI

IACOBI AN- GLIAE REGIS,

*Apologia, & monitoria Praefatio-
nis ad Imperatorem, Reges
& Principes,*

REFUTATIO.

Multa sunt in Libro Se-
renissimi Regis (siue i-
pse, siue alius quis Au-
thor sit) quæ meritò refutari pos-
sunt. Ego pauca ex iis seligam; ac
ca potissimùm, quæ vel planè no-
ua, vel certè non admodum pro-
crita sunt. A reliquis, quæ sæpè
in

in disceptationem venerunt, lubens abstinebo. Erunt autem duæ partes Refutationis : quarum priori discutienda hæc controuersia est ; *An Rex Angliæ in suo regno, iure, usurpet sibi Primatum Ecclesiæ, nec ne?* Ipse affirmat. Ego contrarium ostendam. Vtar autem hac methodo.

1. *An Rex iure naturali habeat Primatum Ecclesiæ?*
2. *An iure diuino Veteris Testamenti?*
3. *An iure diuino Noui Testamenti?*
4. *An iure Ciuili vel Canonico?*
5. *An consensu doctorum hominum?*

A 5 6. *An*

6. *Antitulo præscriptionis?*
7. *An secundum principia sue doctrine?*
8. *Si non habet Primatum, Ecclesiæ, quod ergo officium illius circa Ecclesiam sit?*

Posteriori parte Refutationis, refellam breuiter aliquot Paradoxa, seu falsa dogmata, quæ passim reperio in Libro Serenissimi Regis; & quæ hactenus fortasse, à nemine ex professis refutata sunt: ac præsertim de his capitibus.

1. *De Vicario Christi.*
2. *De Vicario Dei.*
3. *De statu Henoch & Helie.*
4. *De morte Henoch & Helie.*
5. *De duobus Testib. Apoc. ii.*
6. *De*

6. *De B. Virgine Maria.*
7. *De fundamento fidei.*
8. *De Concilio Generali con-
uocando.*

His duabus partibus perficitur tota Refutatio; in qua, & breuitatem sectabor, ne molestus sim; & modestiam, ne offendam. Cur autem nihil addam, vel de *Antichristo*, de quo tamen copiosè disputat Serenissimus Rex: vel de *Iuramento fidelitatis*, propter quod omnis controuersia nata est; nemo mirari debet. Vix dubito, quin R^{mus} & Illust^{mus} Cardinalis Bellarminus de hoc posteriori pūcto acturus sit: & quidem suo more, tam solidè ac neruosè, vt nihil opus sit, alios in eodem

dem argumēto operam ponere. Antichristum verò , triplici de causa non attingo. Primo, quia iam ante de illo tractavi in libello, qui inscribitur: *Disputatio de Antichristo reformato*. Secundo, quia in hoc genere nihil ferè præter coniecturas à Rege: nihil præter mendacia, ab aliis adferri video. Tertio, quia tanta est inter ipsos dissensio, vt se potius conficiant, quàm nos. Hoc facile ostendam in solis Anglicanis scriptoribus. Gabriel Pouelus, Oxoniensis Baccalaureus, in suo Tractatu de Antichristo, sanctè affirmat, hanc propositionem, *Papa est Antichristus*, esse articulum fidei. Verba eius sunt hæc: *Deum sanctè testor, me tam certo scire,*
Ponti-

*Pontificem Romanū esse magnum
 illum Antichristum, quā Deum
 ipsum esse in cælo Creatorem visi-
 bilium & inuisibilem, & Iesum
 Christum esse verum Messiam. At
 hoc negat Rex Angliæ. Tametsi
 enim, nō semel dicat, Papam esse
 Antichristum; non tamen vult
 adeo certū & exploratum id ef-
 se, vt pro articulo fidei habēdum
 sit, sed pro sola coniectura. Sic e-
 nim habet in monitoria Præfati-
 one: Sanè, quod ad definitionē An-
 tichristi, nolo rem tam obscuram
 & iuuolutam, tanquam omnibus
 Christianis ad credendum necessa-
 riam, urgere. (Quod sine du-
 bio faceret Baccalaureus, si Rex
 esset.) Et iterum: Id autem mihi
 maxi-*

maximè in votis est, ut si cui hanc meam de Antichristo coniecturam libebit refellere, singulis disputationis meae partibus ordine respondeat. Coniecturam vocat: non articulum fidei. Nisi forte hæc duo in Anglia pro synonymis sint. Imo, quod amplius est, ingenuè fatetur, se tanti facere Pontificem Romanum, ut ipsi potius, quam ulli alteri Episcopo daturus esset suffragium, si de Primatu inter ipsos ageretur. Quod si in eo, inquit, questio adhuc verteretur, meo libens suffragio primum locum Episcopo Romano deferrem: Ego Occidentalis Rex, occidentali Patriarchæ adhererem. Quomodo ergò potest illum

illū agnoscere pro Antichristo? Iam Sacellanus Regis, non minus honorificè de eo sentit. Nimirum, concedit illi potestatem excommunicandi Reges. *Aliud, inquit, est, priuare Regem bonis Ecclesie communibus, quod facit sententia, & potest forte Pontifex: aliud priuare bono proprio, id est, regno suo, quod non facit sententia, nec potest Pontifex.* Addit quidem particulam, *forte*, sed inde satis colligitur, quod non credat esse articulum fidei, *Papam esse Antichristum.*

Propter has igitur causas, nihil de Antichristo, nihil de Iuramento fidelitatis tractare volui. Porro duas illas partes refutationis,

nis, quas paulo ante proposui, ea breuitate & modestia, qua poterō, iam aggressurus sum: idq; ad maiorem Dei gloriam, & Ecclesiæ Christi ædificationem.

Prima

Prima pars refutationis

DE PRIMATV REGIS ANGLIÆ.

I.

SERENISSIMVS ac Potentissimus Rex Angliæ Iacobus, in sua *Apologia pro iuramento fidelitatis*, & in *monitoria Præfatione* ad Imperatorem, Reges & Principes, conatur ostendere, Se in Anglia, & vnumquemque Regem in suo regno, esse caput seu Primatem Ecclesiæ. Episcopos & Pontificem, non modo in temporalibus, sed etiam in Ecclesiasticis rebus, inferiores esse Rege ac Principe sæculari. Hunc Regis Primatum confirmat Sacellanus ipsius in libro, qui inscribitur *Tortura Torti*: Iure, an iniuria, deinceps inquirendum est.

2. Sed ne confusio oriatur, status controuersię prius explicandus, & certa ab

B incertis

incertis fecernenda sunt. Ac primò, non disceptamus de primatu in temporalib. Illum quisque Rex in suo regno legitimè habeat. De Primatu Ecclesiæ, seu de potestate Ecclesiastica, tota lis est. Solet autem distingui triplex potestas Ecclesiastica. Vna ordinis; altera iurisdictionis interioris; tertia iurisdictionis exterioris. Prima refertur ad Sacramenta conficienda & ministranda. Secunda ad regendum populum Christianum in foro conscientiæ. Tertia ad eundem populum regendum in foro exteriori. Igitur ad potestatem ordinis spectat, baptismum & sacros ordines conferre, Eucharistiam conficere & ministrare, Chrisma & oleum infirmorum benedicere. Ad potestatem iurisdictionis interioris, ius dicere in foro cōscientiæ, id est, absoluerè vel ligare. Ad potestatem iurisdictionis exterioris, synodum conuocare & in ea præsidere, constitutiones condere, causas audire & cognoscere, controuersias dirimere, beneficia conferre, ministros Ecclesiæ constituere, delinquentes excommunicare. Vno verbo, omnium causarum & controuersiarum, quæ ad fidem & religio-

religionem pertinent, Iudicem agere.

3. Quando ergo quæritur, an Rex Angliæ in suo regno habeat Primatum Ecclesiæ, debet sic intelligi, an habeat triplicem illam potestatem excellentiori modo, quàm Episcopi & Pontifex? Vel, quod idem est, an in triplici illa potestate, supra Episcopos & Pontificem collocandus sit?

4. Duo certa sunt; vnum in controuersia. Primo, certum est, Regem non vindicare sibi potestatem ordinis; & multo minùs in ea superiorem esse Episcopis & Pontifice. Non enim ordinatus & consecratus est ad Sacramenta conficienda & ministranda, vt per se constat. Nec in hoc genere supra Episcopos & Pontificem collocari vult. Nouit enim quid in simili causa dictum sit Oziæ Regi, 2. Paralip. 26.

18. Non est tui officij Ozia, vt adoleas incensum Domino, sed Sacerdotum, qui consecrati sunt ad huiusmodi ministerium.

5. Secundò, æquè certum est, non habere potestatem iurisdictionis interioris, quæ in absoluendo & ligando consistit. Non enim Regibus, sed Apostolis & Sacerdotibus dictum est; *Accipite Spiritum sanctum: quorum remiseritis peccata remissa*

sunt eis; & quorum retinueritis, retenta sunt.

6. Tota ergo controuersia versatur circa potestatem iurisdictionis exterioris, an eam Rex habeat in suo regno, & quidem supra Episcopos & Pontificem? id est, an Rex sit supremus Iudex Ecclesiasticus, qui sua authoritate à nullo alio in terris dependente, possit conuocare synodos, iis præsidere, controuersias circa fidem & religionem dirimere, beneficia conferre, Episcopos constituere & deponere, & similes actus religionis exercere? Hoc enim est, habere Primatum in Ecclesia, quoad gubernationem exteriorem. Ut autem distinctè examinetur hæc quæstio, hoc ordine procedendum est.

- 1 *An Rex iure naturali habeat Primatum Ecclesiæ?*
- 2 *An iure diuino Veteris testamenti?*
- 3 *An iure diuino Noui Testamenti?*
- 4 *An iure ciuili vel canonico?*
- 5 *An consensu doctorum hominum?*
- 6 *An titulo præscriptionis?*
- 7 *An secundum principia suæ doctrinæ?*
- 8 *Si Rex non habet primatum Ecclesiæ, quodnam illius officium circa Ecclesiam sit?*

CAPVT I.

An Rex iure naturali habeat Primatum Ecclesiæ?

I.

NE ipse quidem ausit hoc affirmare. Et ratio est euidens. Nam status politicus seu ciuilis ex natura rei distinctus est ab Ecclesiastico seu spiritali: Ergo ex natura rei habet distinctum tribunal & iudicium: Ergo iure naturali necesse non est, vt qui præest vni, præsit etiam alteri. Ergo Rex ex eo præcisè, quia iurisdictionem habet in tribunali politico, non habet etiam ex natura rei in Ecclesiastico. Sicut vicissim, Episcopus, qui habet iurisdictionem in foro Ecclesiastico, non habet ex natura rei in temporali. Nihil certius. Vt tamen res melius explicetur, adiungendæ sunt duæ conclusiones.

2. PRIOR CONCLUSIO. In Republica Christiana, duplex est potestas publica. Vna temporalis seu politica, altera spiritalis, seu Ecclesiastica. Ratio est, quia duplex finis Christiano homini

propositus est, ad quem debet pertingere. Vnus naturalis, qui est pax & tranquillitas Reipublicæ; alter supernaturalis, qui est æterna beatitudo. Ad hos fines debet peruenire per diuersa media, quæ sint illis proportionata. Huiusmodi autem media inuenire & præscribere communitati, non est cuiusuis, sed eius, qui supra alios potestatem habet. Itaque duplex debet esse potestas publica: vna temporalis seu politica, quæ præscribat media necessaria ad finem naturalem: altera Ecclesiastica seu spiritalis, quæ præscribat media necessaria ad finem supernaturalem. Loquor autem de potestate publica, vt excludam priuatam, qualis est parentum in filios, Virorum in vxores, & Dominorum in seruos.

3. POSTERIOR CONCLUSIO. Hæ duæ potestates publicæ in multis differunt, vt facile ex dictis colligi potest. Primo, ex parte finis & mediorum; quia politica respicit finem & media naturalia; Ecclesiastica verò, supernaturalia. Secundò, ex parte causæ efficientis; quia politica potest alicui tribui, vel immediatè à Deo, quo pacto tributa est Moysi, lo-
suc,

sue, Sauli, Dauidi: vel à communitate, quo pacto tribuitur Regi Poloniæ, qui eligitur à Senatu : vel iure successionis, quo pacto in Hispania, Gallia, Anglia, filij succedunt parentibus in regimine: vel iure belli, quo pacto Rex vnus regni, la-
 cessitus à Rege alterius regni, potest iusto bello se vindicare, & regnum illius inua-
 dere. Secus est de potestate Ecclesiastica. Cum enim supernaturalis sit, non potest tribui, nisi à solo Deo, præsertim si sermo sit de suprema, de qua hic agimus. Ter-
 tiò, differunt ratione dignitatis. Nam Ec-
 clesiastica nobilior & excellentior est, quàm politica. Vnde Innocentius 3. cap. Solitæ, de Maioritate & obedientia, com-
 parat has duas potestates duobus lumi-
 naribus firmamenti, Soli & Lunæ: Et di-
 cit Ecclesiasticam esse luminare maius, quod præst diei spiritalium; politicam, luminare minus, quod præst nocti tem-
 poralium. Et hoc indicat Christus, cum ait; *Regnum meum non est de hoc mundo.* q. d. Potestas seu iurisdictio temporalis est de hoc mundo : at spiritalis seu Ecclesiasti-
 ca est de cælo. Ergo nobilior est. Et Chry-
 sost. hom. 4. de verbis Isaie; *Hoc regnum illo*

maius est Regi ea, quæ hic sunt, commissæ sunt; Sacerdoti cælestia.

4. EX DICTIS DVO COLLIGIMVS. Vnum est, quod hæ duæ potestates ex natura rei distinctæ sint, & ab inuicem separari possint. Nulla enim potest esse naturalis connexio inter potestatem naturalem & supernaturalem. Vnde si homo creatus esset à Deo in statu puræ naturæ, & ad solum finem naturalẽ (quod fieri potuit) nulla fuisset potestas supernaturalis seu Ecclesiastica, qualis nunc est: ac proinde civilis seu politica fuisset re ipsa separata ab Ecclesiastica. Nunc etiam in statu gratiæ, in quo vtræque potestas locum habet, vna fuit in Christo sine alia. Nam Christus habuit Primatum in Ecclesia, non tamen in Republica civili & temporali, saltem quoad vsum.

5. Alterum est, quod hæ duæ potestates, cum ex natura rei distinctæ & separatæ sint, non nisi iure diuino, vel humano coniungi possint. Igitur deinceps inquirendum est, an Rex Angliæ, qui titulo successionis habet supremam potestatem politicam in suo regno, habeat simul coniunctam potestatem Ecclesiasticam ali-

quo

quo iure positiuo, siue diuino, siue humano.

CAPVT II.

An Rex habeat Primatum Ecclesie iure diuino Veteris Testamenti?

I.

HOc ipse omnino videtur velle. Sic enim habet in sua apologia, pag. 155. *Sub veteri testamento Reges haud dubiò gubernatores erant Ecclesie intra fines suos: corruptelas purgauère: abusus sustulère: arcam ad constitutum quietis locum perduxère: arcæ deportandæ ipsi præsumptauère: Templum edificauère: edificatum dedicauère: & sua præsentia opus consecrationis cohonestarunt: librum legis, tenebris erutum populo recitari fecerunt: fœdus inter Deum populumque redintegrarunt: confregère serpentem æneum, quamuis & diserto Dei mandato erectum, & Christum Dominum suo modo figurantem: idola omnia, Deosque falsos exterminauère: reformationes publicas instituère, conuocatis eo sine &*

B 5 congre-

congregatis promiscuè sacerdotibus & laicis: exauctorauerunt summū Pontificem, aliumq; in eius locum subrogauerunt. In summa, cuncta moderati sunt, quæ ad Ecclesiasticum regimen quoquo modo pertinuerunt. Nec verò tituli, & notæ, quibus insigniuntur, honoraria, ab his eorum actionibus discordant. Vocantur enim Filij Altissimi, imo Dii, & Vncti Domini, in Dei solio sedentes. Famuli Dei, imo Angeli Dei, facti iuxta cor Dei, Lumina Israelis, Nutricii Ecclesie. Hucusque Rex.

2. Ex quibus verbis construi potest hoc argumentum; Reges veteris Testamenti, iure diuino habebant Primatum Ecclesiæ: ergo & Reges Noui Testamenti. Vel sic potius; Reges veteris Testamenti, iure diuino habebant Primatum Ecclesiæ: at hoc ius non est abrogatum, sed adhuc manet. Ergo eodem iure gaudent Reges noui Testamenti. At duplex peccatum in hoc syllogismo committitur. Nam & maior, & minor propositio falsa est. Negamus, in veteri Testamento fuisse ius diuinum de Primatu Regis in Ecclesia. Et, si fuisset, negamus adhuc durare, & non abrogatum esse. Vtrunque breuiter explicandum est per sequentes conclusiones.

3. PRIMA CONCLUSIO. Ius diuinum veteris Testamenti continetur lege Mosaica. Sunt autem triplicia præcepta legis Mosaicæ, moralia, ceremonialia, iudicialia; vt docet D. Thomas in 1. 2. q. 99. art. 2. & sequentibus. Et colligitur ex illo Deuter. 5. 31. *Loquar tibi omnia mandata mea, & ceremonias, atque iudicia* Et Deut. 6. 1. *Hæc sunt præcepta, & ceremonia, atque iudicia quæ mandauit Dominus Deus vester, vt docerem vos.* Et Rom. 7. 12. *Lex quidem sancta, & mandatum sanctum, & iustum, & bonum.* Vbi Apostolus mandatum legis vocat sanctum, propter ceremonialia: iustum, propter iudicialia: bonum, propter moralia, vt explicat D. Thomas loco citato, art. 4. Ratio huius conclusionis est, quia omnis Respublica benè instituta, continet tria præceptorum genera: quorum alia ad priuatos singulorum ciuium mores; alia ad publicam religionem, & cultum Dei; alia ad communem politiam & temporalem gubernationem pertinent.

4. SECUNDA CONCLUSIO. Præcepta moralia summatim continentur in decem præceptis Decalogi, vt docet D.

Thomas

Thomas in 1. 2. q. 100. art. 3. Et quidem tria priora respiciunt cultum diuinum, reliqua, iustitiam cum proximo seruandam. Deus enim colitur tribus modis. 1. per fidelitatem, adhærendo soli vero Deo, & non habendo Deos alienos. 2. per reuerentiam, non assumendo nomen Dei in vanum. 3. per famulatum, colendo sabbathum. Et ita constituuntur tria prima præcepta Decalogi. Cum proximo autem seruatur iustitia, si & parentes honoremus, & alios non lædamus, neque ore, neque opere, neq; corde. Et hæc est summa reliquorum præceptorum Decalogi. DICE S; in Decalogo habetur præceptum de sabbatho sanctificando, quod non est morale, sed ceremoniale. RESPONDEO, Est morale, quoad substantiam; ceremoniale, quoad determinationem certi temporis. Nam ratio naturalis dicitur, Deo deberi aliquem famulatum, cum ipse sit Dominus omnium. Quando autem præstandus sit illi famulatus, pendet ex libera ipsius determinatione.

5. TERTIA CONCLUSIO. Præcepta ceremonialia, quæ præscribunt certas ceremonias pertinentes ad religionem

nem, nihil aliud sunt, quam quædam determinationes eorum præceptorum Decalogi, quæ ad diuinum cultum referuntur, vt docet D. Thomas q. 101. art. 1. Vnde sequitur, tot esse genera præceptorum ceremonialium, quot sunt genera eorum, quæ ad cultum diuinum pertinent. Hæc autem sunt quatuor. 1. sacrificia, vt holocaustum, hostia pacifica, & hostia pro peccato. 2. sacramenta, partim communia omnibus, vt Circumcisio, Esus Agni paschalis, purificationes à quibnsdam exterioribus immunditiis, expiationes à peccatis; partim propria Sacerdotibus, vt consecratio Sacerdotum, Esus panum propositionis & aliorum, quæ erant vsibus Sacerdotum deputata, ablutio manuum ac pedum, & rasio pilorum.

3. Instrumenta diuini cultus, vt Tabernaculum, Templum, Arca fœderis, propitiatorium, candelabrum, mensa, duplex altare, vasa, vestes sacerdotales, & similia. 4. obseruantix legales, quibus ex decreto Dei, populus Iudæorum discernebatur ab aliis gentibus, vt certus vsus ciborum & vestium, ac solennitates festo-
rum

rum. Circa hæc quatuor rerum genera versantur præcepta ceremonialia.

6. QVARTA CONCLVSIO. Præcepta iudicialia, quæ præscribunt certam formam conseruandi iustitiam inter homines, nihil aliud sunt, quam determinationes quædam eorum præceptorum Decalogi, quæ ad iustitiam & politiam humanam conseruandam spectant, vt docet Diuus Thomas q. 104. art. 1. Vnde etiam sequitur, tot esse genera præceptorum iudicialium, quot sunt genera hominum, inter quos iustitia seruari debet. Ea autem sunt quadruplicia. Nam quædam præscribunt certum ordinem iustitiæ inter Principem & populum: quædam inter ipsos populares inter se: quædam inter populum & extraneos: quædam denique inter domesticos eiusdem familiæ, vt inter Parentes & filios; inter maritum & vxorem; inter seruum & Dominum V. G. Pro Principe dantur præcepta, quomodo creandus sit & se gerere debeat in officio. Pro popularibus, præcepta emptionis, venditionis, & aliorum contractuum. Circa extraneos, de bello gerendo, de suscepio-

sceptione peregrinorum & aduenarum. Denique circa domesticos, de seruis, de vxoribus, de filiis.

7. QUINTA CONCLUSIO. Inter hæc triplicia præcepta, triplex potissimum discrimen est. Primum, quod moralia per se contineantur in Decalogo: reliqua extra Decalogum. Alterum, quod moralia sint iuris naturalis; reliqua positiui. Tertium, quod moralia non sint abrogata à Christo, sed melius explicata, Matth. 5. At reliqua abrogata sunt, iuxta illud Lucæ 16. 16. *Lex & Propheta usque ad Ioannem*. Et ad Galatas 3. 24. *Lex pædagogus noster fuit in Christo, ut ex fide iustificemur: at ubi venit fides, iam non sumus sub pædago-*go. Et Hebr. 7. 12. *Translato sacerdotio, necesse est, ut & legis translatio fiat*. Et infra v. 18. *Reprobatio fit precedentis mandati, propter infirmitatem eius & inutilitatem: nihil enim ad perfectum adduxit lex*. Et ratio est, quia lex Mosaica, fuit vmbra legis euangelicæ, teste Apostolo, Coloss. 2. 16. & Hebr. 10. 1. At vmbra cessat, accedente lumine: Ergo veniente lege euangelica, necesse fuit abrogari Mosaicam.

EX DIETIS SIC CONCLVDO; Si Rex
Angl.

Angliæ, iure diuino Veteris Testamenti habet Primatum Ecclesiæ; vel illud ius diuinum continetur in lege morali, vel in ceremoniali, vel in iudiciali. Certum est non contineri in morali. Nam moralis lex generatim comprehenditur decem præceptis Decalogi, vt dictum est. At in toto Decalogo nulla fit mentio Primatus Regis in Ecclesia. Ergo ius diuinum de primatu Ecclesiæ non potest fundari in lege morali. Sed neque in ceremoniali vel iudiciali fundari potest, duplici de causa. Primo, quia vtraque lex per Christum abrogata est: Ergo tametsi Reges in Veteri Testamento, iure diuino habuissent Primatum Ecclesiæ; non tamen sequeretur, Reges in Nouo Testamento, gaudere eodem iure, cum iam penitus abrogatum sit. Et hoc patet in similibus exemplis. Nam in Veteri Testamento iure diuino statutum erat, vt esset vnum templum, in quo omnes adorarent; vt omnes sacerdotes & ministri Ecclesiæ assumerentur ex sola tribu Leui, vt eorum sacrificia essent cruenta ex animalibus, vt Iudices & Reges eligerentur à DEO, non à populo. At hæc omnia iam
abroga-

ogata sunt. Ergo quæ iure diuino statuta erant in veteri Testamento, non amplius eodem iure debent censerī statuta nouo Testamento. Vnde sicut hæc conuentia non valet; *Omnes ministri Ecclesiæ erant olim in eadem tribu: Ergo & nunc ita fiet.* Sic neque valet ista; *Omnes Reges habebant olim primatum Ecclesiæ: Ergo etiam nunc habent.*

ADDO, nunquam in Veteri Testamento, diuino iure concessum fuisse Regis primatum Ecclesiæ. Hoc si probaui, corruit totum fundamentum Regalium Hierarchiæ. Probo autem efficaciter rationibus. Prima est, quia totum est, quod DEVS disposuit circa Reges veteris Testamenti, habet Deum testem. 17. in his verbis; *Cum ingressus fueris terram, dabit tibi Dominus DEVS tuus, & possideas eam & dixeris, Constituam super me Regem; sicut habent omnes per circuitum nationum constitues, quem Dominus DEVS tuus elegerit de numero fratrum tuorum. Non poteris alterius gentis hominem Regem facere, qui sit frater tuus. Cumque fuerit constitutus, multiplicabit sibi equos, nec reducet populum in Ægyptum, equitatus numero subleua-*

tus, præsertim cum Dominus præceperit vobis, ut nequaquam amplius per eandem viam reuertamini. Non habebit uxores plurimas quæ alliciant animum eius, neque argenti & auri immensa pondera. Postquam autem sederit in solio regni sui, describet sibi Deuteronomium legis huius in volumine, accipiens exemplar a sacerdotibus Leuiticæ tribus, & habebit secum, legetque illud omnibus diebus vitæ suæ, ut discat timere Dominum Deum suum, & custodire verba & ceremonias eius quæ in lege præcepta sunt. Nec eleuetur cor eius in superbiam super fratres suos, neque declinet in partem dexteram vel sinistram, ut longo tempore regnet ipse & filius eius super Israel. Habes hic totam dispositionem iuris diuini circa Reges Veteris Testamenti. Atqui nulla fit mentio Primatus Ecclesiæ. Solum explicantur hæ paucæ conditiones. Prima, ut Rex eligatur à Deo. Secunda, ut ex populo Iudæorum, non ex gentibus assumatur. Tertia, ut non multiplicet equos, nec reducat populum in Ægyptum. Quarta, ut non habeat plurimas uxores, præsertim alienigenas, quæ alliciant illum ad idololatriam, sicut accidit Salomoni. Quinta, ut non colligat immensas diuitias.

tias, quia ex illarum cupiditate solent reges ad tyrannidem declinare, & iustitiam derelinquere. Sexta ut à sacerdotibus accipiat præcepta legis Mosaicæ; eaque describat, & diligenter obseruet. Cur autem à Sacerdotibus? quia illorum est iudicare, quæ circa legem & religionem sunt. Septima ut moderatè se gerat erga alios, & non eleuetur cor eius in superbiam super fratres suos. Multo minus supra sacerdotes, Episcopos, & Pontifices. Octaua ut sectetur Iustitiam, & non declinet ad dextram vel sinistram; quod solet euenire vel ex fauore & acceptione personarum, vel ex spe lucri, & utilitatis, vel ex odio seu alia peruersa affectione.

10. EX HIS omnibus ita concludo; Quicquid de Regis electione, officio, & potestate statutum est iure diuino Veteris Testamenti, hoc continetur in supradictis conditionib. Atq; in illis nihil habetur de Primatu Regis in rebus Ecclesiasticis: Ergo primatus Regis in rebus Ecclesiasticis non est de iure diuino veteris Testamenti.

II. LOQVOR AVTEM DE IVRE DIVINO, quia constat in veteri Testamento fuisse duplex ius Regium: Alterum diui-

num, quod iam explicatum est, & de quo solo hic agimus : alterum vsurpatum seu tyrannicum, quod describitur. 1. Reg. 8. 10. his verbis; *Dixit itaq, Samuel omnia verba Domini ad populum, qui petierat à se Regem, & ait; Hoc erit ius Regis qui imperaturus est vobis. Filios vestros tollet, & ponet in curribus suis, facietq, sibi equites & praecursores quadrigarum suarum, & constituet sibi tribunos & centuriones & aratores agrorum suorum, & messorum segetum, & fabros armorum & curruum suorum. Filias quoque vestras faciet sibi vnguentarias, & focarias & panificas. Agros quoq, vestros, & vineas, & oliueta optima tollet & dabit seruis suis. Sed & segetes vestras, & vinearum redditus addecimabit, vt det Eunuuchis & famulis suis. Seruos etiam vestros & ancillas & iuuenes optimos, & asinos auferet, & ponet in opere suo. Greges quoque vestros addecimabit, vosque eritis ei serui. Et clamabitis in die illa à facie Regis vestri, quem elegistis vobis: & non exaudiet vos Dominus in die illa, quia petistis vobis Regem.* His, inquam, verbis non describitur ius Regis quod à Deo concessum est, sed quod à tyrannis solet vsurpari, vt rectè docet diuus Thomas in 1.2 q. 105. art 1. ad 5. & fatetur Calvinus l. 4.

Instit.

Instit. cap. ultimo, §. 26. Et de hoc iure loquitur Christus Matth. 20. 25. & Luc. 22. 25. *Reges gentium dominantur eorum; vos autem non sic.*

12. HINC ETIAM PATET, quare Samuel ægrè tulerit, quod Iudæi petierint sibi Regem dari; quia nimirum petebant Regem, qui more gentilium, non qui iure diuino, eos gubernaret, ut aperte colligitur ex illo 1. Regum 8. 4. *Congregati ergo uniuersi maiores natu Israel, venerunt ad Samuelem in Ramatha. Dixeruntque ei: Ecce, tu senuisti, & filij tui non ambulant in viis tuis: constitue nobis Regem, ut iudicet nos, sicut & uniuersæ habent nationes, &c.* Haftenus prima ratio.

13. SECUNDA EST; Ipsimet Reges veteris Testamenti ingenuè fassi sunt, se non habere primatum Ecclesiæ, sed sacerdotes: Ergo manifestum est, non ipsos sed sacerdotes habuisse. Antecedens patet, quia Iosaphat Rex, qui sane fuit optimus, & officii sui minimè ignarus, de Regis & sacerdotis potestate sic ait, 2. Paralip. 19. 11. *Amarias sacerdos & pontifex vester, in his, quæ ad Deum pertinent, presidebit: Porro Zabadias filius Ismael, qui est dux in*

domo Iuda, super ea opera erit, quæ ad Regis officium pertinent. Quid clarius? Hæc duo hic opponuntur; Præsidere in his, quæ ad Deum pertinent; Et præsidere his, quæ ad officium Regis pertinent. Illud prius conuenit Sacerdoti seu Pontifici; hoc posterius, Vicario Regis. Atqui primatum habere in Ecclesia, est vnum ex iis, quæ ad Deum pertinent: Ergo conuenit Pontifici, non regi, aut Vicario Regis.

14. **TERTIA** ratio. Ille censetur habere primatum Ecclesiæ à Deo, qui in rebus ad legem diuinam, & eius interpretationem pertinentibus, constitutus est supremus iudex, cui oporteat obedire, vt supra explicatum est: Atqui non Rex, sed sacerdos constitutus est talis Iudex à Deo: Ergo non Rex, sed Sacerdos habet Primatum Ecclesiæ à Deo. Minor patet ex illo Deuteron. 17. 8. *Si difficile & ambiguum apud te iudicium esse perspexeris inter causam & causam; Et iudicium intra portas tuas videris verba variari: surge, & ascende ad locum, quem elegerit Dominus DEVS tuus: Veniesque ad sacerdotes Levi- tici generis, & ad Iudæm, qui fuerit illo tempore; quæresque ab eis, qui indicabunt tibi iudicij*

iudicij veritatem. Et facies quodcunque dixerint, qui præsunt loco, quem elegerit Dominus, & docuerint te iuxta legem eius; sequerisque sententiam eorum, nec declinabis ad dextram, nèque ad sinistram. Qui autē superbierit, nolens obedire sacerdotis imperio, qui eo tempore ministrat Domino DEO tuo, & decreto iudicis, morietur homo ille. Hic tria notanda sunt. Primum, quod sermo sit de controuersis legalibus, quæ difficultatem habent, & in vtramque partem ab inferioribus Iudicibus trahuntur. Alterum, quod huiusmodi controuersie non ad Regem, sed ad summum sacerdotem, tanquam ad legitimum Iudicem deferendæ sint. Tertium, quod sub pœna mortis oporteat acquiescere sententiæ sacerdotis. At si Rex esset supra sacerdotem à Deo constitutus, non opus esset stare iudicio Sacerdotis, sed liceret ad Regem tanquam ad superiorem iudicem prouocare. At hoc non licet. Non ergo Rex, sed sacerdos est supremus Iudex controuersiarum legalium à DEO constitutus.

15. HVC SPECTAT ILLVD AGGAEI.

2.12. *Hec dicit Dominus; Interroga Sacerdotes*

C 4 *legem*

legem. Non Regem. Et Malachia. 2. 7. La-
bia Sacerdotis custodient scientiam; & legem
requirent ex ore eius. Non ex ore Regis, sed
Sacerdotis. Et quare? Causa mox addi-
tur; quia Angelus Domini exercituum est. q.
d. Sacerdos est nuncius seu Interpres di-
uinæ voluntatis. Igitur à Sacerdote pe-
tendum est, quid DEVS fieri à nobis, vel
circa nos velit. Quod clarius explicatur
Numer. 27. 21. Pro Iosue, si quid agendum
erit, Eleazar sacerdos consulat Dominum. Ad
verbum eius egredietur & ingredietur ipse,
& omnes filij Israel cum eo, & cetera multitu-
do. Eodem pertinet illud Leuit. 10. 8. Dixit
quoque Dominus ad Aaron: Vinum, & omne,
quod inebriare potest, non bibetis tu, & filij tui,
quando intratis in tabernaculum testimonij;
ut habeatis scientiam discernendi inter san-
ctum & prophanum, inter pollutum & mun-
dum; doceatisque filios Israel omnia legitima
mea. Hic vides, non Regum, sed Sacerdo-
tum esse, discernere inter sanctum & pro-
phanum, & legem DEI docere ac inter-
pretari. Vnde sicut Azarias pontifex ad
Oziam Regem dixit 2. Paralip. 26. 18. Non
est tui officij Ozia, ut adoleas incensum Domi-
no, sed sacerdotum, qui consecrati sunt ad hu-
iusce-

cermodi ministerium ; sic etiam potuisset
 cere ; *Non est tui officij Ozia* , *ut discernas*
er sanctum & prophanum, sed sacerdotum,
i ad hoc ministerium à DEO constituti sunt.
 consequenter, Non est tui officii Rex,
 gubernes Ecclesiam, sed Sacerdotum,
 ius iure diuino id commissum est.
 urfus, sicut Ozias Rex, contra impe-
 um Pontificis volens adolere incensum,
 pra percussus est, sic etiam, qui vellet si-
 arrogare primatum Ecclesiæ, eadem
 pena haud indignus esset.

5. OSTENDI HACTENVVS, Regem
 Angliæ nihil præsidij pro suo Primatu sta-
 liendo habere posse ex Veteri Testa-
 mento, duplici de causa. Primo quia Re-
 ges in Veteri Testamento non habue-
 unt primatum Ecclesiæ iure diuino, sed
 sacerdotes, ut tribus rationibus iam pro-
 atum est, Secundo, Etiam si habuissent,
 non tamen sequeretur, etiam Christiani-
 os Reges habere, cum ius Veteris Te-
 stamenti abrogatum sit. Contra hanc po-
 teriorem partem nihil opponit Rex An-
 gliæ. Contra priorem verò multa obiicit,
 non ex iure, sed ex facto petita, ut supra
 vidimus quæ singillatim discutienda sunt.

I. Obiectio, ex facto Regis
Iosaphat.

17. **R** Educam omnes obiectiones Regis Angliæ ad formam syllogisticam, ut facilius earum vis appareat. Prima est hæc; Quicumque constituit Leuitas & Sacerdotes in aliqua ciuitate, habet Primatum Ecclesiæ; Atqui Rex Iosaphat constituit Leuitas & Sacerdotes in Ierusalem: Ergò habuit Primatum Ecclesiæ. Minor patet ex illo 2. Paralip. 19. 8. *In Ierusalem quoq; constituit Iosaphat Leuitas & Sacerdotes, & Principes familiarum, &c.*

18. **R**ESPONDEO. Si textus integrè citaretur, multò fortius argumentum fieret contra Regem, quam pro Rege. Textus enim sic habet; *In Ierusalem quoq; constituit Iosaphat Leuitas, & Sacerdotes, & Principes familiarum ex Israel, ut iudicium & causam domini iudicarēt habitatoribus eius. Præcepit q; eis dicens. Omnem causam, quæ venerit ad vos fratrum vestrorum, qui habitant in urbibus suis, ostendite eis, ut non peccent in dominum. Amarias autem Sacerdos & Pontifex vester, in his, quæ ad DEVM pertinent, præstabit. Porro Zabadias filius Ismahel, qui est*
Dux

Dux in domo Iuda, super ea opera erit, quæ ad Regis officium pertinent. In quo textu tria notanda sunt. Primò, quod Iosaphat Rex, non solum Leuitas & Sacerdotes, sed etiam Principes familiarum constituerit in Ierusalem. Secundò, quod illos omnes in eum finem constituerit, vt essent Iudices controuersiarum, quæ in populo oriri solent. Tertiò, quod in cõtrouersijs Ecclesiasticis, quæ ad DEVM pertinent, Sacerdotes constituti sint Iudices; in ciuilibus verò, quæ ad officium Regis spectant, Principes familiarum. Hinc sumo tale argumentum contra Regem Angliæ; Sacerdotes iure diuino constituti sunt supremi Iudices omniũ controuersiarum, quæ ad Deum & religionem pertinent: Ergo Sacerdotes iure diuino tenent primatum Ecclesiæ: Item; Ea, quæ ad Deum pertinent, distincta sunt ab iis, quæ pertinent ad officium Regis: Ergo Rex, ex officio suo, non potest immiscere se iis, quæ ad Deum pertinent: Ergo non tenet primatum Ecclesiæ.

19. ARGVMENTVM contrarium facilè soluitur. Non enim Iosaphat Rex constituit, id est, creauit & consecrauit Sacerdotes,

dotes, quia hoc ad officium eius non pertinebat; sed ex iis, qui iam antea creati & consecrati erant, certos delegit, qui iudicium Domini exercerent in Ierusalem; sicut etiam certos delegerat, qui in aliis ciuitatibus populum docerent, vt habetur 2. Paralip. 17. 7. Vbi notandum est, tria spectari posse in ministris Ecclesiæ Veteris Testamenti. 1. Electionem seu designationem personæ. 2. Consecrationem. 3. Applicationem ad certum vsum seu exercitium. Electio seu designatio non fiebat à Rege, sed à DEO, qui solam tribum Leui ad ministerium sacrum deputauerat. Consecratio verò commissæ erat Aaroni, tanquam summo Sacerdoti, & eius successoribus. Applicatio verò ad certum officium poterat fieri à Rege; sicut etiam nunc fieri potest. Quo pacto Rex Angliæ diceretur in suo regno constituerè lesuitas & Sacerdotes, si ex iis iam antea ordinatis & consecratis quosdam aliunde euocaret, quorum alij conciones ad populum haberent, alij Confessiones exciperent, alij alijs ministeriis deputarentur. Et hoc passim apud Catholicos in vfu est. Nemo tamen propterea censet,

cenſet, eos Principes, qui hoc modo Ieſuitas ad ſe vocant, Primatum Eccleſia tenere.

2. Obiectio, ex factō Davidis & aliorum regum.

20. **S**ECUNDA obiectio eſt hæc; Qui tollunt abusus & corruptelas Eccleſiaſticas, habent Primatum in Eccleſia: Reges Veteris Teſtamenti ſuſtulerunt abusus & corruptelas Eccleſiaſticas: Ergo habuerunt Primatum in Eccleſia. Minorem probat Sacellanus Regis Angliæ dupliciter. Primo ex illis verbis 2. Reg 5 6. *Et abiit Rex & omnes viri, qui erant cum eo, in Ieruſalem, ad Iebuſæum habitatorem terræ dictumq; eſt David ab eis; Non ingredieris huc, niſi abſtuleris cecos & claudos dicentes: Non ingreditur David huc.* Ex quibus verbis ſic argumentatur; Ad Regem Davidem ſpectabat, de templo cæcum & claudum tollere: Ergo ad eum ſpectabat, omnes abusus tollere. *Non enim abusus aliunde exiſtunt, quam vel de inſcitia, quod cæci ſint homines, vel de incuria, quod in officio claudicent.*

claudicent. Secundo probat exemplo aliorum Regum, qui in scriptura reprehenduntur, quod Excelsa non sustulerint. At non reprehenderentur, nisi ad eorum officium pertineret, Excelsa tollere. Quid autem aliud est tollere Excelsa, quam tollere ab& corruptelas?

21. RESPONDEO, generatim cum distinctione. Nam aliud est, iudicare seu discernere, quænam sint corruptelæ & abusus in religione: aliud verò, corruptelas & abusus, quando certò constat tales esse, tollere & exterminare. Prius pertinet ad officium summi Sacerdotis. vt supra dictum est. Posterius non modo Regi, sed etiam cui libet patrifamilias concessum est. Quilibet enim in sua domo potest ea emendare, quæ certò constat per abusum irrepsisse. Vtrumque ostendo exemplis Noui Testamenti. Inter Christianos quæri solet, an sit abusus seu corruptela, habere & colere imagines, inuocare sanctos, pro defunctis orare, plura possidere beneficia Ecclesiastica, voto castitatis se obstringere, certis diebus à carnibus abstinere: de his iudicare, non pertinet ad principes sæculares, sed ad prælatos Ecclesiæ.

At postquam res iudicata est, quilibet Rex in suo regno, quilibet magistratus in sua ciuitate, quilibet paterfamilias in sua domo, potest executionem præstare. Idem factum est in Veteri Testamento. Deus sæpe per Prophetas ostendit, displicere sibi, quod populus adoleret in Excelsis. Itaque diuinitus constabat, abusum seu corruptelam esse. Rex in suo regno poterat tollere hunc abusum. Imo tenebatur. Nec ideo tamen primatū habebat in Ecclesia. Non magis quàm si Deus per Prophetas ostenderet, cōnubia fidelium cum gentilibus sibi displicere: & quisque paterfamilias in sua domo, si quid in hoc genere peccatum esset, in posterum emendaret. An ideo Primatum teneret in rebus ad Religionem pertinentibus? Nequaquā: Sed executor esset voluntatis diuinæ. Cur autem potius Reges, quam Sacerdotes in Veteri Testamento reprehensi sint, quod Excelsa non tollerēt: ideo factum est, quia populus Iudæorum, propter duritiem cordis, non curabat exhortationes & monita Sacerdotum ac Prophetarum: nec aliter, quā vi & auctoritate Regis, ab errore sinebāt
fc

feruocari. Itaq; si Rex in hac re negligentior esset, meritò à Deo reprehendebatur Hoc generatim.

22. Dv o in particulari explicanda sunt. Alterum, de abusu adolendi & sacrificandi in Excelsis. Alterũ, de cœcis & claudis eijciendis. Quod ad prius attinet, tria certa sunt. Primum est, quod ab egressu filiorum Israel ex Ægypto, transacti fuerint 580. anni, antequam templum à Salomone ædificaretur, vt patet ex illo 3. Reg. 6. 1. *Factum est ergo quadringentesimo & 80. anno egressionis filiorum Israel de terra Ægypti, ædificari cepit domus Domino.* Secundum est, quod toto illo tempore, secundum legem ordinariam, iussi sint Israelitæ offerre sacrificia in eo loco, in quo esset tabernaculum fœderis cum Arca, vt habetur Leuit. 17. 4. Porro tabernaculum cum Arca non semper mansit eodem loco. Nam primis 40. annis fuit cum populo in deserto. Postea, cùm terram promissionis ingressi essent, & eam pacificè possiderent, positum fuit in Silo, iuxta illud Iosue 18. 1. *Congregatiq; sunt omnes filij Israel in Silo, ibiq; fixerunt tabernaculum testimonij, & fuit eis terra subiecta.* Inde separatim
arca,

arca, separatim tabernaculum, in diuersa loca translata sunt. Arca quidem in eum locum, in quo Israëlitz bello victi sunt à Philistinis, vlt. anno Heli sacerdotis, 1. Regum 4. 3. Tunc enim & capta est à Philistinis, 1. Reg. 4. 11. & asportata in Azotum, 1. Reg. 5. 1. Et mansit in eorum regione septem mensibus, 1. Reg. 6. 1. Deinde remissa est ab illis in urbem Bethsames 1. Reg. 6. 12. Postea in Cariathiarim, 1. Regum 7. 1. Ibi que mansit, donec David confirmato iam regno super Iudam & Israel, reduxit eam ex Cariathiarim, 1. Paral. 13. 6. mansitq; in domo Obedom Gethæi tribus mensibus, 1. Paral. 15. 25. Tabernaculum autem ex Silo (licet de tempore non satis constet) translatum fuit in Nobe ciuitatem Sacerdotum, vbi erat, cum David fugiebat Saulem, 1. Reg. 21. 1. Inde venit in Gabaon, urbem Tribus Benjamin, 1. Paral. 21. 29. Ibi autem mansit, donec cum Arca illatum est à Salomone in Templum, 3. Reg. 8. 4.

23. TERTIVM est, quod ab eo tempore, quo perfectum fuit Templum Salomonis, non alibi, quàm in illo Templo liouerit offerre sacrificia, secundum legē

que Iosaphat, quod rectum erat in conspectu Domini. Veruntamen excelsa non abstulit. Adhuc enim populus sacrificabat, & adolebat incensum in Excelsis. Loquor autem de Excelsis, vbi non esset Tabernaculum, quia in Excelso Gabaon, vbi erat Tabernaculum, licebat immolare, 3. Reg. 3. 4. Abiit Salomon in Gabaon, ut immolaret ibi: illud quippe erat Excelsum maximum, id est, præferebatur omnibus Excelsis, quod in eo esset Tabernaculum à Mose factum, ut patet 1. Paralip. 21. 29. Tabernaculum autem Domini, quod fecerat Moses in deserto, & altare holocaustorum, ea tempestate erat in Excelso Gabaon. Et 2. Paral. 1. 3. Et abiit cum uniuersa multitudo in Excelsum Gabaon, ubi erat Tabernaculum fœderis Domini, quod fecit Moses famulus DEI in solitudine. Vbi obiter notandum est, fuisse duo Tabernacula: Vnum à Mose factum, de quo haftenus dixi. Alterum à Dauide, quod ipse tetendit in Ierusalem, quando eo deduxit Arcam fœderis, de quo 2. Paralip. 1. 4. Arcam autem DEI adduxerat Dauid de Cariathiarim in locum, quem preparauerat ei, & ubi fixerat illi Tabernaculum, hoc est, in Ierusalem. Et 3. Regum 1. 50. Adonias autem

timens Salamonem surrexit, & abiit, tenuitque cornu altaris. Et cap. 2. 28. *Fugit ergo Ioab in Tabernaculum Domini, & apprehendit cornu altaris.* Hæc non possunt intelligi de Tabernaculo à Moïse factò, quia illud eo tempore erat in Gabaon, vt suprà dictum est. Debet ergo intelligi de Tabernaculo à Dauide factò, quod erat in Ierusalẽ. Vide Abulensem l. 3. Reg. cap. 1. q. 41.

25. HACTENVS de abusu abolendi in Excelsis. Quod ad factum Dauidis attinet, qui dicitur cæcos & claudos eiecisse, parum, vel nihil ad rem facit. Historia sic habet. Intellexerat Dauid diuino instinctu, vt ex Psalmis colligitur, Ierusalem fore templi ac regni Iudæorum sedem, ac proinde cum exercitu eò profectus est, & à Iebusæis, qui eam colebant, deditionem illius postulauit. At illi responderunt; *Non ingredieris huc, nisi abstuleris cæcos & claudos dicentes; Non ingreditur Dauid huc.* Porro quid cæcorum & claudorum nomine intelligendum sit, variæ sunt authorum interpretationes. Nam aliqui putant fuisse tantum statuas, seu imagines; alij veros homines. Statuas quidem tripliciter. Primò, vt per eas su-
per

per muros positas significati fuerint homines otiosi. q. d. Etiam nobis nihil agentibus intrare non poteris, tam scilicet munita vrbs nostra est. Secundò, vt per eas significata fuerint ædium fastigia, quibus illæ affixæ essent, q. d. Nisi transcendens ædium nostrarum fastigiis, non ingredieris. Tertiò, vt fuerint duæ imagines, quarum altera repræsentauerit Isaac cœcutientem, altera Iacob claudicantem: Et hæ duæ propterea fuerint ad muros seu portas ciuitatis affixæ, vt significarent, Iudæis non licere bello infestare Iebusæos, eo quod parentes eorum, Isaac & Iacob, percussissent olim fœdus pacis cum Rege Abimelech, cuius posterierant Iebusæi; interposito etiam iuramento, quod in ore illarum imaginum descriptum erat. Hæc Rabinorum sententia est; sed falsa. Primò, quia illud fœdus cum Rege Abimelech non est initium à Iacob, sed ab Abraham, vt habetur Genes. 21. 22. *Eodem tempore dixit Abimelech ad Abraham: DEVS tecum est in vniuersis quæ agis. Iura ergo per DEVM, ne noceas mihi & posteris meis. Dixitq; Abraham, Ego iurabo, Et infra. Percusseruntq; ambo fœ-*

D 3 dus

du. Secundo, quia si Iebusæi voluissent pacare animum Davidis, & militum eius, per aspectum seu memoriam Isaac & Iacob; non debuissent eos in forma cæci & claudi (quæ potius ad contemptum & derisum spectabat) sed in alia decentiori & augustiori representare. Tertio, quia illa verba, quæ sequuntur in textu *cæcos & claudos, odientes animam David;* nullo modo possunt accommodari Isaac & Iacob; neque præ se ferunt desiderium pacis, sed odij potius ac contentionis.

26. ALII ergò rectiùs sentiūt, fuisse veros homines: quod èt tripliciter intelligi pot. PRIMÒ, q̃ fuerint ipsi met Iebusæi, qui dixerint Davidi; *Nisi abstuleris cæcos & claudos;* id est, nisi nos abstuleris, quos tu conuitio militari cæcos & claudos appellasti, *non ingredieris huc.* SECUNDO, quod fuerint cæci & claudi, nō corpore sed animo, id est, peccatores & flagitiosi. TERTIO, quod fuerint verè cæci & claudi, quos in contemptum Davidis posuerint Iebusæi in manibusq. d. Nostra ciuitas tā firma & munita est, vt nō egeat aliis defensoribus, quàm his cæcis & claudis, qui sufficienter poterunt eam contra tuū exercitum tueri
ac pro-

ac propugnare. Hæc est vera explicatio huius loci, quam sequitur Ioseph. l. 7. c. 2. Theodoret. q. 16 17. Glossa interlinearis, Abulens. q. 7. & plures alij. Simile quid legimus contigisse in vrbe Tyro, quæ cum, esset fortissima, ciues in contemptum obfidantium, posuerunt Pygmæos in mœnibus, quasi illi abunde sufficerent ad eius defensionem, nec indigerent alio propugnatore. De his loquitur Ezechiel Propheta c. 27. 11. *Sed & Pygmai, qui erant in turribus tuis (ô Tyre) pharetras suas suspendebant in muris tuis per gyram, &c.*

27. Ex hac autem expositione, quæ sine dubio litteralis & germana est, non potest colligi, Dauidem auferendo cæcos & claudos, voluisse ostendere, quod abusus & corruptelas Ecclesiæ esset ablaturus, vt fingit Sacellanus Regis Angliæ. Credo, ne quidem in mentem illi hoc venisse, cum ea res gesta est. Sed, etsi id facere voluisset, non ideo sequeretur, habuisse illum Primum Ecclesiæ, quia, vt supra dixi, quilibet paterfamilias potest tollere abusus & corruptelas, quando certo constat, tales esse.

3. Obiectio, ex facto eiusdem Davidis.

28. **T**ERTIA OBIECTIO est hæc; Qui perducit Arcam fœderis ad constitutum quietis locum, & Arcæ deportandæ præsumit, tenet Primatum Ecclesiæ: Atqui Rex David perduxit Arcam ad constitutum quietis locum i. Paral. 13. 12. & Arcæ deportandæ præsumit, 2. Reg. 6. 14. Ergo habuit Primatum Ecclesiæ. Hoc argumentum magni facit Sacellanus Regis, & vim facit in eo, quod David saltauerit ante, non post Arcam. Nam hoc ipso, inquit, significauit se Primatum tenere in negotio Arcæ deportandæ. Mira hominis subtilitas. Cur non similiter vim facit in eo, quod boues Arcam præcesserint, non secuti sint?

29. Vt autem magis appareat huius augmenti vanitas, tria notanda sunt. PRIMVM est, quod in Arca Domini fuerint hæc tria. *Urna aurea habens manna, & Virga Aaron, quæ fronduerat, & tabula Testamenti*, vt expressè testatur Apostolus Hæbr 9. 4. ALTERVM, quod hæc Ar-

ca, præsertim quoad manna, quod in ea custodiebatur, fuerit typus seu figura nostræ Eucharistiæ. Ratio autem figuræ consistit in his. 1. Manna datum est Israelitis peregrinantibus in deserto, ut possent ad terram promissionis peruenire. 2. habuit omnem saporem suauitatis corporalis (Sap. 15. 20.) 3. fuit cibus de cælo missus (Ioan. 6. 31.) 4. fuit expositum dubitationi (Psalm. 77. 32.) & contradictioni (Num. 21. 5.) 5. licet alii plus, alii minus colligerent, eandem tamen mensuram postea habebant (Exodi 16. 18.) Hæc omnia accommodantur Eucharistiæ. 1. quia datur Christianis in deserto huius vitæ peregrinantibus, ut possint ad vitam æternam peruenire. 2. continet omnem saporem suauitatis spiritualis. 3. est cibus de cælo missus. 4. exposita est dubitationi Capharnaitarum, & contradictioni Caluinistarum. 5. siue sub magna, siue sub parua hostia sumatur; æquè prodest sumentibus.

30. TERTIVM est quod hæc tria distinguenda sint. 1. Arcam ædificare. 2. eam deducere, comitari, vel præcedere. 3. eandem portare vel attingere. Arcam

ædificarunt Bezeliel de tribu Iuda, & Oolias de tribu Dan. Exodi 31. 2. Arcam deduxerunt, & ante eam luserunt, non solus Rex, sed etiam populus, vt patet ex illo. 1. Reg. 4. 4. *Misit populus in Silo, & tulerunt inde Arcam fæderis domini exercituum sedentis super Cherubin.* Et 2. Reg. 6. 5. *Dauid autem, & omnis Israel ludebant coram domino in omnibus lignis fabrefactis.* Et infra v. 15, *Dauid & omnis domus Israel ducebant Arcam Testamenti domini in iubilo.* Et 3. Reg. 8. 5. *Rex autem Salomon, & omnis multitudo Israel, gradiebatur cum illo ante arcam.* At nemini licebat eam tangere, propter sanctitatem (quam & aliunde, & ex eo habebat, quod figura esset Eucharistiæ) nisi solis Sacerdotibus. Hinc Oza, quod eam tangere præsumpsisset, cum sacerdos non esset, morte à Deo punitus est, 2. Reg. 6. 6. Imo ne Leuitis quidem hoc licuit. Nam vt patet Num. 4. iuebantur sacerdotes velo arcam obuoluere, & vestes per annulos arcæ transmittere, ne Leuitæ, qui illam portaturi essent, eam attingerent.

31. Ex his patet, quam friuolum sit argumentum Sacellani Regis, quando sic infert; Rex Dauid deduxit & præcessit
Arcam

Arcam Domini: Ergo habuit Primatum Ecclesiæ. Cur non similiter infert; Omnis multitudo Israel gradiebatur ante Arcā: Ergo habuit Primatum Ecclesiæ? Vel sic; Pueri Christiani præcedunt Eucharistiā, quando publicè in processione deportatur; Ergo habent Primatum Ecclesiæ. Ineptè omnia. Potius sic oportebat argumentari; Non licuit Regibus, sed solis Sacerdotibus, attingere Arcam domini: Ergo Sacerdotes præferuntur Regibus, in iis, quæ ad Deum & religionem pertinent.

4. *Obiectio, desumpta ex facto Salomonis Regis.*

32. QUARTA OBIECTIO est talis; Qui ædificat templum, & Deo dedicat, tenet primatum Ecclesiæ: Atqui Rex Salomon ædificauit Templum, & Deo dedicauit, 1. Paral. 28. 6. Et 2. Paral. 6. 10. Ergo Rex Salomon tenuit primatum Ecclesiæ. Hoc argumentum sic vrget Sacellanus; *Dedicare Deo templa, actus est primarius, neque cuiusquam, nisi cuius partes in Religione primæ. At templum à Salomone dedicatum est: Ergo.*
NON

33. NON video hic plus subtilitatis, quàm in præcedenti argumento. Vt hoc ostendam, tria notanda sunt. PRIMVM est, quod templum Hierosolymitanum, de quo agimus, ter dedicatum sit. PRIMÒ à Salomone. 3. Reg. 8.1. SECUNDO ab iis, qui è captiuitate Babylonica reuersi sunt, 1. Esdræ 6.16. TERTIO à Machabæis, cùm post prophanationem esset iterum renouatum & sanctificatum, 1. Machab. 4.36. ALTERVM est quod dedicare rem aliquam DEO, si vim nominis spectes, nihil aliud sit quàm dicare illam cultui diuino, seu offerre, & destinare illam ad colendum DEVM. Hoc modo (Exodi 35.) dicuntur Israelitæ, tam viri, quàm fœminæ, hyacinthum, purpuram, byssum, coccum, pilos caprarum, pelles arietum, metalla & ligna cetim dedicasse Deo, id est, obtulisse ad cultum diuinum. Eod ē sensu Salomon dicitur Templum Deo dedicasse, id est, diuino cultui dicasse seu mancipasse. Hinc non magis colligi potest Primatus Salomonis, qui ligna & lapides; quàm fœminarum, quæ aurum, purpuram, & hyacinthum Deo dedicarunt. TERTIVM est, quod in hac templi dedicatione

catione à Salomone facta variæ ceremoniæ usurpatæ fuerint cum solenni lætitia. Nam primo, postquam templum ædificatum est, congregati sunt Israelitæ ad Regem Salomonem in Ierusalem. 2. Sacerdotes intulerunt Arcam, tabernaculum, & omnia vasa sanctuarii in Templum. 3. Deus, ut ostenderet sibi placere, quod agebatur, nebula impleuit templum. 4. Salomon gratiis Deo actis, multa precatus est, & præsertim, ut quicumque essent oraturi Deum in templo isto, exaudirentur. 5. Finita hac oratione, victimæ & sacrificia Deo oblata sunt. 6. Iterum secuta est benedictio seu gratiarum actio; ac tandem octavo die, populus ad suum gaudium dimissus est. Hæc omnia habentur 3. Reg. 8.

34. NEQUE hinc colligi potest Primatus Salomonis; quod sic ostendo. Tria hominum genera spectari hic debent. 1. Salomon. 2. Sacerdotes. 3. Populus. Quid quisque horum fecit in hac dedicatione? Salomon orauit, & gratias Deo egit. Sacerdotes portarunt Arcam, Tabernaculum, Vasa sanctuarii, & obtulerunt sacrificia. Populus interfuit, & gratiis Deo actis,

Etis, lætatus est. Si quid ergo pro primatu Salomonis colligendum est, sic colligi debet; Quicumque in templo recens ædificato, orat Deum, ut in eo exaudiantur preces & vota supplicantium, is tenet Primatum Ecclesiæ: Atqui Salomon in templo à se recens ædificato oravit Deum, ut in eo exaudirentur preces & Vota supplicantium: Ergo tenuit primatum Ecclesiæ. At maior propositio apertè falsa est. Quasi nemo, nisi qui supremam iurisdictionem in Ecclesia habet, eo modo, quo Salomon, orare possit. Multi mercatores, suis sumptibus, templa in honorem Dei erexerunt, & quotidie erigunt. An non liceat ipsis orare, ut **DEVS** accepta ea habeat, & preces seruorum suorum in iis exaudiat? Omnino sanè. Imo, plerique clerici, quoties dedicatio alicuius templi occurrit, solent orare hoc modo: *DEVS qui nobis per singulos annos huius sancti Templi tui consecrationis reparas diem, & sacris semper mysteriis representas incolumes; exaudi preces populi tui, & presta, ut quisquis hoc templum beneficia petiturus ingreditur, cuncta se impetrasse letetur. Per dominum nostrum IESVM CHRISTVM filium tuum &c.*

Itemq;

Itemq; hoc modo: *DEVS* qui innisibiliter omnia continet, templum hoc potentia tua inhabitationis illustra, & concede, ut omnes, qui huc deprecaturi conueniunt, ex quacunque tribulatione ad te clamauerint, consolationis tue beneficia consequantur. Per dominum nostrum &c. An hinc inferas, singulos clericos, qui sicorant, supremos esse prælatos in Ecclesia? Nihil minus.

35. *PLVS DICAM.* Faciamus in aliqua dioecesi Anglicana templum incendio perire, vel ab hostibus deuastari. Episcopus suis sumptibus curet restaurari. Conuocet deinde populum sibi subiectum; Inferat vasa sacra: Oret Deum, ut ratum habeat hoc obsequium, & preces subditorum exaudiat: Offerat sacrificium: Benè precetur populo, & gratias Deo actis, dimittat vnūquemq; cum gaudio. Quid? An dices hunc Episcopum esse Primatem Ecclesiæ? Si est, quid de Rege fiet? Si non est, quid minus fecit, quam Salomon? Imo totum id præstitit, quod Salomon & sacerdotes simul.

5. *Obiectio, desumpta ex facto eiusdem Regis Salomonis.*

36. **Q**VINTA OBIECTIO est talis: Qui deponit summum sacerdotem ab officio, & alium illi subrogat, necessario habet iurisdictionem supra summum sacerdotem: Atqui Salomon Rex deposuit Abiathar summum sacerdotem ab officio, & subrogavit illi Sadoc. 3. Reg. 2: 27. Ergo Salomon Rex habuit iurisdictionem supra summum Sacerdotem. Hoc est præcipuum argumentum pro Primatu Regis. Sed sanè parui momenti. Ac primum, sic retorqueri potest: Qui deponit regem ab officio, & alium illi subrogat, necessario habet iurisdictionem supra Regem: Atqui Ioiada summus sacerdos, non solum deposuit, sed etiam occidit Athalias reginam, & Ioas in eius locum subrogavit. 4. Reg. 11. Ergo Ioiada summus sacerdos habuit iurisdictionem supra Regem.

37. SED ad rem. Hæc obiectio duo supponit. Vnum, quod Salomon, quando deposuit Sacerdotem ab officio, usus sit potestate

testate regiâ. Alterum, quod rectè ac legitime eâ usus sit. At neutrum probari potest. Imo grauissimi Authores constanter docent, non regia, sed prophetica potestate usum esse; nec ordinaria via, sed ex peculiari Dei instinctu fecisse, quod fecit. Ita Cardinalis Bellarminus, Iacobus Gretserus, & plures alii. Et videtur colligi posse ex illis verbis, 3. Reg. 2. 27. *Eiecit ergo Salomon Abiathar, ut non esset Sacerdos Domini, ut impleretur sermo Domini, quem locutus est super domum Heli in Silo.* q. d. Olim tempore Heli Sacerdotis prædictum fuit à Deo per Samuelem Prophetam, fore aliquando, ut officium sacerdotale auferatur à familia Heli, propter peccata filiorum eius, 1. Reg. 2. 31. Vt ergo hæc prophetia impleretur, Salomon diuino instinctu, tanquam verus Propheta, abstulit sacerdotium ab Abiathar, qui erat ex familia Heli.

38. Quod si ita est, facile apparet, nullius momenti esse obiectionem Regis Angliæ. Nam nihil aliud ex facto Salomonis colligi poterit, quàm Prophetas accipere aliquando extraordinariam potestatem à Deo etiam supra Sacerdotes; quod

E nihil

nihil ad rem facit. Non enim disputamus de potestate Prophetarū, sed Regū. Nec status controuersia est, an Prophetæ ex peculiari Dei instinctu possint aliquando punire Sacerdotes; sed, an Reges ordinaria sua potestate possint id facere? Hæc valde distincta sunt. Et alterum cum altero minimè connexum est. Non enim sequitur; Salomon Rex ex peculiari Dei instinctu, submouit Abiathar Sacerdotē ab officio Sacerdotali: Ergo Iacobus Rex, ordinaria sua potestate, potest idem facere. Non magis, quam si dicam; Nathan ex peculiari Dei instinctu reprehendit Dauidem Regem: ergo quilibet subditus in Anglia, potest ordinaria via reprehendere Iacobum Regem.

29. Sed demus (quod tamen probari non potest) Salomonem in submouendo Sacerdote, vsum esse potestate regia; quid quæso hinc efficitur contra nos? Nihil sanè, nisi prius constet legitimè ea vsum esse. Hoc autem nec in Scripturis sacris dilertè exprimitur; nec ex iis euidenter deduci potest. Aliud enim est, factum alicuius recenseri; aliud, probari seu commendari. Legimus quidem in
Scriptu-

Scriptura, Raziam gladio & præcipitio se-
ipsum occidisse. Legimus, à Saule Sacer-
dotes Domini; ab Abimelech septuagin-
ta fratres; ab Athalia, semen regium; ab a-
liis alios interfectos esse. At non legimus,
hæc omnia iustè ac legitimè contigisse. I-
dem dico de Salomone. Legimus, ab eo
depositum esse Abiathar sacerdotem. At
nō legimus, rectè ac legitimè id factū esse.
Vel ergo probandū est Regi Angliæ, factū
esse legitimè; vel nihil cōtra nos cōcludit.
40. Dicit fortè; Abiathar grauitè pec-
cauerat contra Salomonem Regē, ac pro-
inde dignus erat, qui puniretur. Potuit er-
go Salomon autoritate regia illum pu-
niri. Respondeo. Nō sequitur. Esto enim;
peccauerit Abiathar propter iniquā con-
spirationem, & dignus propterea fuerit,
qui officio submoueretur. An ideo à Sa-
lomone submoueri legitimè potuit? Id
minimè consequens est. Non enim qui li-
bet reus à quolibet puniri potest, sed ab
eo duntaxat, qui in illum habeat legiti-
mam potestatem ac iurisdictionē. Hanc
autem habuisse Reges Iudæorum in Sa-
cerdotes, nondum probatum est. I-
mo ex ipsis Iudæis contrarium probari
E 2 potest

potest. Semper enim persuasum ipsis fuit, Reges non habere vllam iurisdictionem in eos, qui ministerio diuino deputati sunt. Hoc satis colligitur ex illo, 1. Reg. 22. 16. *Dixit Rex Saul: morte morieris Abimelech, tu & omnis domus Patris tui. Et ait Rex emissarijs, qui circumstabant eum; Conuertimini, & interficite Sacerdotes Domini; nam manus eorum cum Dauid est. Noluerunt autem serui Regis extendere manus suas in Sacerdotes Domini.* Ex quibus verbis patet, Regem Saulem mandasse suis famulis, vt interficerent Sacerdotes Domini, eo quod conspirassent cum Dauid contra ipsum Regem. Porro famulos Regis, qui erant Iudæi, & optimè norant eminentiam Sacerdotum supra Reges, non voluisse id facere, etiamsi Rex mandasset. Nam certo persuasum illis erat, non posse Regem legitimè id mandare, nec Sacerdotes imperio Regis subiaccere. Quod etiam aduertens Rex, homini barbaro ac gentili imperauit, vt quod famuli facere renuissent, ipse imperterritus exequeretur. Quod etiam factum est. Subiungitur enim in textu; *Et ait Rex ad Doëg: Conuertere tu, & irruere in Sacerdotes.*

Conuer-

Conuersusq; Doëg Idumaus irruit in Sacerdotes.

41. Hinc ita concludo ; Saul & Salomon fuerunt pares in potestate regia ; nec plus iuris habuit Salomon in Sacerdotes, quàm Saul, ex ea præcisè parte, qua Reges erant. Atqui Saul, quâ Rex, non habuit legitimam potestatem puniendi Sacerdotes : ergo nec Salomon. Maior per se nota est. Minor patet ex dictis, quia famuli Saulis non recusassent imperium sui Regis, si putassent illum habere legitimam potestatem in Sacerdotes. Libenter enim parebant illi in persequendo Dauide. Quod ergo nollent parere in occidendis sacerdotibus, qui adhærebât Dauidi ; nō aliunde prouenire potuit, quàm quod putarent, Regē habere potestatem in Dauide, non autem in Sacerdotes. Idem ergo de Salomone, quâ Rex erat, statuendum est. Si enim Saul non licuit punire Sacerdotes Domini ; nec Salomoni potuit licere. Vterque enim, quâ Rex, pari potestate fuit præditus.

42. Dices ; Non rectè hoc sequitur. Fuit enim aliunde, dispar causa vtriusque. Nam Sacerdotes à Saule interfecti, erant

innocentes. Abiathar autem, quem Salomon puniuit, erat reus læsæ maiestatis. Quis porro nesciat, aliud esse, interficere innocentes, quod fecit Saul; aliud, punire reos, quod fecit Salomon? Esto igitur; non rectè ac legitimè fecerit Saul; rectè tamen ac legitimè fecit Salomon. Respōdeo. Hæc disparitas non obstat. Tametsi enim Sacerdotes, qui iubebantur interfici à Saule, reipsa fuerint innocentes; nihilominus famuli Saulis, putabant esse nocentes, ac reos læsæ maiestatis: Nec tamen putabant licere Regi, etiam nocentes Sacerdotes interficere. Hoc inde constat; quia parebant Regi in persequendo Dauide, vt dictum est: & ideo parebant, quod existimarent Dauidem iniustè aspirare ad regnum, ac proinde læsæ maiestatis reum esse. Alias sanè non parituri. Cum ergo audissent à Saule, Sacerdotes adhærere Dauidi, quid aliud suspicari poterant, quam eos etiam nocentes ac reos esse? Et tamen obtemperabant Sauli in prosequendo Dauide, non autem in necandis Sacerdotibus. Nec alia de causa, quam quod verè putarent, Regem habere

bere potestatem puniendi & coercendi laicos, non autem Sacerdotes.

43. Ex his abundè satisfactum est argumento Regis, quod, vt compendio repetam, quæ dicta sunt, dupliciter formari potest. Primo, in hunc modum; *Salomon potestate prophetica legitimè puniuit Sacerdotem: Ergo Rex Iacobus, potestate regia, idem præstare potest.* Secundo sic; *Salomon potestate regia legitimè puniuit Sacerdotem: Ergo Rex Iacobus idem præstare potest.* In priori forma, negatur consequentia; in posteriori, antecedens. Nec à Rege Angliæ vnquam probari poterit.

6. Obiectio ex factō Iosias Regis.

44. **S**EXTA obiectio est hæc. Qui librum legis è tenebris erutum, populo recitari facit, & fœdus inter Deum populumque redintegrat, habet Primatum Ecclesiæ: Vtrunque fecit Rex Iosias, 4. Regum 22. & 23. Ergo habuit Primatum Ecclesiæ.

Hoc argumentū vrget Sacellanus Regis

in hunc modum, *Libro reperto, indixit Rex conuentum, in eo iubet recitari librum, recitato fœdus nouum init cum Domino, populum quoque ad fœdus adiurauit. Tum præcipit ipsi Pontifici, reliquisque secundi ordinis sacerdotibus, ut eijciant è templo, atque exurant vasa omnia, quæ Baali sacra fuerant, ut excelsa demoliantur. Mandauit post de Paschate nouo faciendo, denique de religione tota in integrum reformanda.*

45. Multæ sunt partes huius argumenti. PRIMA, quod Rex, reperto libro legis Mosaicæ, conuocarit populum, ut eum illi prælegeret. Fateor, Sed Helcias Pontifex, qui librum repererat, eo fine miserat Regi, ut id faceret. SECUNDA, quod Rex iusserit recitari librum Legis. Esto. Etiam fœminæ apud aduersarios legunt Biblia, aut ancillis recitari iubent. TERTIA, quod recitato libro, fœdus nouum inierit cum Deo, id est, quod promiserit Deo, se velle custodire omnia præcepta, quæ scripta erant in libro Legis. An non cuilibet, etiam priuato homini, hoc licitum est? Optarim sanè, singulos Christianos ita affectos esse, ut inito cum Deo fœdere, promitterent se legem seuaturos.

QUARTA, quod populum hortatus sit, ut idem præstaret. At hoc non soli Regi, sed cuilibet concionatori licitum est apud suos auditores. Nisi quod aduersarij dicant, Legem seruatu impossibilem esse; In quo multum discrepant à Iosia, quem tantopere laudant. QUINTA, quod præceperit Pontifici & sacerdotibus secundi ordinis, ut proijcerent de templo Dei omnia vasa, quæ facta fuerant Baal, & aliis falsis Diis. Merito sanè; quia hoc ad illos pertinebat. Nec tam præcepit, quàm eos officij sui cōmonuit. SEXTA, quod mandauerit Pascha celebrari, quod diu fuera t intermissum. At à DEO præceptum erat, ut celebraretur. Poterat ergo Rex urgere executionem. SEPTIMA, quod totam religionem iusserit in integrum reformari. Bonum factum. Nec tamen iudicium de Reformatione, sed executio ad Regē pertinebat; iudicio reseruato Sacerdotibus.

7. *Obiectio ex facto Ezechiae Regis.*

46. SEPTIMA OBIECTIO; Ezechias Rex confregit serpentem æneum, E 5 quam-

quamuis & deserto DEI mandato erectum, & Christum dominum suo modo figurantem. 4. Reg. 18. 4. Ergò tenuit Primatum in Ecclesia. Hic duo dicenda sunt. 1. Ex qua causa vel occasione id fecerit Ezechias. 2. Qua autoritate fecerit. De priori, sic res habet. Serpens æneus ab initio, in bonum vsum erectus fuit mandato DEI, iuxta illud Numer. 21. 8. *Locutus est Dominus ad Moysen: Fac serpentem aneum, & pone eum pro signo: qui percussus aspexerit eum, viuet. Fecit ergo Moses serpentem aneum, & posuit eum pro signo: quẽ cum percussi aspicerent, sanabantur.* At postea, progressu temporis, abiit in abusũ, quia filii Israel adolebant ei incensum, vt habetur. 4. Reg. 18. 4. idq; propterea, quod meminissent, olim ex solo illius aspectu sanatos fuisse, quotquot à serpentibus morfi erant in deserto: & putarent, se tunc quoque præsidii aliquid ab eo sperare posse. Hunc abusum volens tollere Ezechias, non alia via commodius id facere potuit, quàm serpentem ipsum, qui erat occasio idololatriæ, tollendo & confringendo. At qua autoritate id fecit? Non alia, quàm diuina. DEVS enim, non solum Regi, sed cuilibet è populo man-

mandauerat, vt auferrent omnem cultū idololatriæ, Deut. 7. 5. *Aras eorum subuertite & confringite statuas, lucosq; succidite, & sculptilia comburite, quia populus sanctus es Domino Deo tuo.* Quid ergò mysterii hic est, quod Ezechias confregerit serpentem æneum, quod quilibet alius facere potuisset?

47. DICES; Serpens æneus, & DEI mandato factus erat, & CHRISTVM figurabat. Quid tum? Si ideò aliis non licuit eum confringere, cur Regi licuit? aut si Regi licuit, cur aliis non item? Nusquā legimus, Regi peculiare quid concessum fuisse circa serpentem, quod aliis similiter concessum non sit. Et quid dicemus de arca Noë? Nonne, & mandato DEI facta fuit, & CHRISTI Ecclesiam figurauit? Omnino. An ideo soli Regi permissum fuit, illam dissoluere, post peractum diluuium? Nemo dixerit.

8. Obiectio, sumpta ex titulis Regum Veteris Testamenti.

48. **R**EX Angliæ, sicut hætenus ex facto Regū Veteris Testamenti conatus est astruere primatum suum in Ecclesia; ita nunc ad titulos eorum conuocatur. Sunt autem hi. 1. Reges vocantur *Filij altissimi*. 2. *Dij* 3. *Vncti Domini*. 4. *in solio DEI sedentes*. 5. *Famuli DEI*. 6. *Angeli DEI*. 7. *Facti iuxta cor Dei*. 8. *Lumina Israël* 9. *Nutritij Ecclesiæ*. Ergo habent Primatum in Ecclesia.

49. Videamus, quid lateat in his titulis. PRIMVS est, Reges, inquit, vocantur filii altissimi, iuxta illud 2. Regum 7. 14. *Ego ero ei (Salomoni) in patrem, & ipse erit mihi in filium*. Sed quæro, an non omnes pii ac fideles sint filii DEI, qui ex CHRISTI institutione dicunt, *Pater noster, qui es in cælis*? An non de omnibus piis ac fidelibus intelligendum sit illud 1. Ioan. 3. 1. *Videte, qualem charitatem dedit nobis Pater, ut filij DEI nominemur & simus*? Nihil dubito. Cur ergo Rex Angliæ hunc titulum

tulum, quem CHRISTVS & Apostoli volunt omnibus bonis communem esse, solis Regibus arrogare vult? Et Sacellanus, qui tantopere fauet suo Regi, an se filium DEI esse non putat? An in tota Anglia, solum Regem eo priuilegio gaudere censet? Nisi dicat, omnes quidem pios, sed Reges peculiari quodam modo filios Dei esse. Etiamne improbos? Si soli probi sunt, iam non sanè, quàm Reges, sed quàm probi, filii DEI sunt.

50. SECUNDVS TITVLVS; Reges vocantur Dii, psalm. 81. 6. *Ego dixi, dñ estis.* Et Exodi 22. 8, *Si inuenitur fur, duplum reddet, si latet fur, Dominus domus applicabitur ad DEOS.* Mirares. Solent aduersarii grauius accusare Catholicos, quod Pontificem Romanum appellant Deum. Et ipsi suos Reges impune appellari sic volunt. Imò sacræ Scripturæ testimoniis abutuntur. Nam illud, *Ego dixi, Dñ estis*, non de solis Regibus, sed de Prophetis quoque intelligendum esse, disertè explicat CHRISTVS Ioan. 10. 34. cum ait, *Nonne scriptum est in lege vestra, quia ego dixi, Dñ estis? Si illos dixit Deos, ad quos sermo DEI factus est, &c.* Similiter illud, *Dominus domus* appli-

applicabitur ad Deos, non de Regibus, qui tunc nulli erant, sed de Iudicibus intelligendum esse, quis nescit? Si ergo non soli Reges, sed etiam alii vocari possunt Dii; quid est, quod ex hoc titulo colligit Rex Angliæ, Reges, & non alios, esse Primates Ecclesiæ?

SI. TERTIVS TITVLVS; Reges vocantur Christi, seu vncti Domini. 1. Reg. 24. *11. Non extendam manum meam in Dominum meum quia Christus Domini est.* Fateor. At non soli Reges, sed etiam Sacerdotes in Veteri Testamento vngebantur. Et quamquam hoc neget Sacellanus Regis, ita tamen clarum est, vt negari, nisi impudenter, non possit. Testimonia scripturæ passim obuia sunt. Exodi 29. 7. *Oleum vntionis fundes super caput eius, atq; hoc ritu consecrabitur.* Et Leuit. 4. 3. *Si Sacerdos, qui vntus est, peccauerit.* Et Leuit. 8. 12. *Fundens oleum super caput Aaron, vnxit eum & consecrauit.* Et Num. 3. 3. *Hæc nomina filiorum Aaron Sacerdotum, qui vnti sunt, & quorum consecratae manus, vt sacerdotio fungerentur.* Et 2. Machab. 1. 10. *Qui est de genere Christorum Sacerdotum.* Imò etiam Prophetæ vngebantur. 3. Reg. 19. 16. *Iehu filium.* Nam si
unges

unges regem super Israel; Eliseum autem filium Saphat, unges Prophetam pro te. Hinc ita concludo; Vtriq̃ue, tam Sacerdotes, quàm Reges, in Veteri Testamento, vocabantur *Vncti Domini*: Ergò si solus ille titulus spectetur, vel vtriq̃ue, vel neutri habebant Primatum Ecclesiæ. Si vtriq̃; cur de Sacerdotibus negat Rex Angliæ? Si neutri, cur de Regibus affirmat? Addo. Vel sermo est de externa vnctione, vel de interna. Si de externa, communis ea fuit Regibus, Sacerdotibus & Prophetis, vt dictum est. Si de interna, nemo fidelium excluditur. Omnes vncti sunt. 2. Cor. I. 21.

Qui unxit nos DEVS. Et 1. Ioan. 2. 20. *Vos vnctionem habetis à Sancto.*

52. **QUARTVS TITVLVS;** Reges dicuntur in folio DEI sedere. 2. Paral. 9. 8. *Sit Dominus DEVS tuus benedictus, qui voluit te ordinare super thronum suum, Regem Domini DEI tui.* Sed constat duplex esse regnum: vnum terrenum, alterum spirituale. Duo igitur folia, duo throni distinguendi sunt. Reges sedent in folio regni terreni: Episcopi in folio Ecclesiæ, quod est regnum spirituale. Act. 20. 28. *Attendite vobis & uniuerso gregi, in quo vos Spiritus Sanctus posuit*
Epi-

Episcopos regere Ecclesiam DEI. Nec Regibus, sed Apostolis dictum est à CHRISTO Matth. 19. 28. *Cum sederit filius hominis in sede maiestatis suæ, sedebitis & vos super sedes duodecim iudicantes duodecim tribus Israel.* En, Apostoli Regum iudices erunt; non Reges Apostolorum.

53. QUINTVS TITVLVS, Reges vocantur serui Dei. 2. Paral. 6. 15. *Qui prestisti seruo tuo David, patri meo, quæcunque locutus fueras ei.* Ita est. Sed an Soli Reges sunt serui Dei? An non etiam Apostoli & Episcopi? Act. 4. 29. *Et nunc Domine, da seruis tuis cum omni fiducia loqui verbum tuum.* Act. 16. 17. *Isti homines serui Dei excelsi sunt, qui annunciant vobis viam salutis.* Roman. 1. 1. *Paulus seruus IESV CHRISTI.* An non omnes pii Christiani? Roman. 6. 22. *Nunc autem liberati à peccato, serui autem facti Deo.* Occurrit Sacellanus, omnes quidem pios ac fideles vocari seruos Dei, sed tamen Regibus per quandam eminentiam conuenire hunc titulum. Audio. Sed in quo consistit hæc eminentia? An quia Reges sunt magis pii, quam cæteri fideles? At non semper id verum est. An quia seruiunt Deo in altiori gradu, quam cæteri

cæteri? Hoc ipsum est in quæstione. Ego contendo Apostolos & Episcopos seruire in altiori gradu. Seruiunt DEO in regno Christi, quod *non est de hoc mundo*. Sunt *dispensatores mysteriorum DEI*. 1. Corin. 4. 1. Et q̄, amplius est, sunt *adiutores DEI*. 1. Cor. 3. 9. Imo sunt Patres seu *gentiores* filiorum DEI, 1. Corinth. 4. 15. Sunt *fundamenta*, supra quæ reliqui ædificati sunt, Ephes. 2. 20. Denique, si plura expetantur, sunt supra conditionem seruorum Dei, Ioan. 15. 14. *Iam non dicam vos seruos, quia seruus nescit, quid faciat Dominus eius. Vos autem dixi amicos, quia omnia, quæcunq; audiui à Patre meo, nota feci vobis.*

§4. SEXTVS TITVLVS; Reges vocantur Angeli Dei, 2. Reg. 14. 20. *Tu autem Domine mi Rex, sapiens es, sicut habet sapientiam Angelus DEI, ut intelligas omnia super terram.* Sed quid hinc colligi potest? Non aliud, quam ex omnibus Iudæorum Regibus, solum Dauidem vocatum fuisse Angelũ Dei, idq; à muliere; non ob regiam potestatem, sed ob singularem sapientiã, qua erat præditus. Quid si ego plus adferam pro Sacerdotibus? Non de vno tantũ sed de omnibus dictum est illud Malach. F lach.

Malach. 2. 7. *Labia Sacerdotis custodient scientiam, & legem requirēt ex ore eius, quia Angelus domini exercituum est.* Nunc expendamus, vter rectius concludat, Rex Angliz; an ego. Regis illatio est hæc; David habuit tantam sapientiam, vt Angelo similis esse videretur: Ergo omnes Reges sunt tales: quisq; igitur Rex in suo regno Primatum Ecclesiæ tenet. Ineptè. Hæc autem mea est; Omnes Sacerdotes summi in Veteri Testamento, vocati sunt Angeli Dei, quia Dei voluntatem certò & infallibiliter aliis annunciabant, quod non poterant Reges: Ergo Sacerdotes in rebus ad Deum pertinentibus erant supra Reges.

§§. SEPTIMVS TITVLVS; Reges dicuntur facti iuxta cor Dei; 1. Reg. 13. 14. *Quæsiuit Dominus sibi virum iuxta cor suum.* Esto hoc. Quid tum? An quia David Rex fuit vir iuxta cor Dei, omnes Reges tales sunt? Imò, contra res habet. Saul Rex, quia non erat vir secundum cor Dei, à regno exclusus est: David autem, quia erat talis, Sauli subrogatus. Sic enim loquitur Scriptura; *Dixit Samuel ad Saul; stultè registi, nec custodisti mandata Domini DEI tui, quæ precepit tibi.*

tibi. *Quod si non fecisses, iam nunc preparasset Dominus regnum tuum super Israel in sempernum sed nequaquam regnum tuum ultra consurget. Quæ sivit Dominus sibi virum iuxta cor suum, ut esset Dux super populum suum.* Nec ullius momenti est distinctio Sacellani, cum ait, Regem dupliciter dici posse iuxta cor Dei. 1. quoad personam Regis. 2. quoad officium seu magistratum Omnes Reges, etiam malos, licet priori modo non sint iuxta cor Dei, posteriori tamen esse. Sed, si hoc sufficit, omnes etiam Sacerdotes & Episcopi sunt secundum cor Dei. Imo magis, quam Reges. Nam Deus in Veteri Testamento sponte & ex proprio beneplacito constituit magistratum sacerdotalem: regium autem, non nisi ex importuna ludæorum postulatione concessit, ut habetur 1. Reg. 8 5. Igitur Sacerdotum magistratus magis fuit secundum cor Dei, quam Regum.

56. OCTAVVS titulus: Reges vocantur Lucernæ Israelis, 2. Reg. 21. 17. *Tunc iraverunt viri David, dicentes: Iam non egredieris nobiscum in bellum, ne extinguas lucernam Israel.* Fateor. Sed etiam Apostoli vocantur à Christo *Lux mundi*, Matth. 5. 14. Et Episcopi

scopi septem Ecclesiarum Asiæ, vocantur *septem stelle*, Apoc. i. 20. Si ergo Reges ideo habent primatum in Ecclesia, quia appellantur *Lucernæ*; cur non similiter Apostoli & Episcopi habeant primatum, cum appellantur *stellæ*, & *lux mundi*? Non enim hic titulus minor est, quam ille. Hinc formato tale dilemma: Hæc propositio, *Qui vocatur Lucerna, Lux Stella, habet primatum Ecclesiæ*; vel vera, vel falsa est. Si vera, sequitur Apostolos & Episcopos habere primatum Ecclesiæ, quod Rex Angliæ negat. Si falsa, sequitur Regem Angliæ ex falso fundamento procedere.

57. NONVS titulus: Reges vocantur Nutritii Ecclesiæ, Isai. 49. 23. *Et erunt Reges nutritii tui, & Reginae nutrices tue*. Sed adde quod sequitur: *Vultu in terram dimisso adorabunt te, & puluerem pedum tuorum lingent*. Loquitur Propheta de futura Christi Ecclesia; & dicit, fore aliquando tempus, quando Reges & Reginae gentiles convertentur ad fidem Christi, & sic magno incremento augebunt Ecclesiam, eamq; tanquam sponsam Christi venerabuntur. At hinc non efficitur Reges & Reginas fore primates Ecclesiæ, sed potius filios & sub-

subiectos. Et sanè, si vim faciamus in voce, *Nutritius*, quis magis nutriuit Ecclesiam Christi, quam Apostoli & eorum successores, qui per vniuersum orbem prædicarunt Euangelium, & omnes gentes, cum suis Regibus & Reginis, Ecclesiæ Christi aggregarunt?

§8. HACTENVS de titulis. Ex quibus sic concludo; Apostoli & Episcopi non habent minores titulos, quam Reges; imo sæpe maiores: si ergo ex titulis debeat colligi Primatus Ecclesiæ, non minus Apostoli & Episcopi, quam Reges, erunt primates in Ecclesia; imo multo magis. Vtrumq; ostendo Inductione. 1. Reges vocantur *filiu Altissimi*. Non minus Apostoli. 2. Reges vocantur *Dii*. Etiam Sacerdotes & Iudices Ecclesiastici. 3. Reges vnguntur. Etiam Sacerdotes. 4. Reges sedent in folio terreno: At Apostoli & Episcopi in cœlesti. 5. Reges sunt *serui DEI*. At Apostoli, *iam non serui, sed amici*. 6. Reges sunt *Angeli DEI*. Nec minus Sacerdotes. Imo toti generi Sacerdotum id conuenit: non toti Regum. 7. Reges sunt *iuxta cor DEI*. Multo magis Sacerdotes & Apostoli. 8. Reges sunt *lucerna Israelis*: At Apostoli

li *lux mūdi*. 9. Reges sunt *nutritiū* Ecclesiæ.
At Apostoli Patres Nutritiorum.

Conclusio totius capitis.

59. **H**OC capite ostensum est, nullum
extare Ius diuinum Veteris Te-
stamenti pro primatu Regum: extare ta-
men pro primatu Sacerdotū. Nec aduer-
sarios vllum Ius pro se hætenus allegasse,
sed ex solis Regum factis & titulis argu-
mentatos esse. Hanc autem argumentan-
di rationem non solū infirmam esse, sed
etiam magis nobis, quàm ipsis patrocina-
ri. Hæsi autem diutius in hoc capite, quia
si semel probatum sit, ex Veteri Testamē-
to nihil adferri posse pro Primatu Regis:
consequenter ostensum erit, Reges nullo
modo esse Primates Ecclesiæ. Nam Sacel-
lanus Regis Angliæ fatetur, fundamentū
illius Primatus in solo Veteri Testamen-
to quæri oportere: & nullum illius in No-
uo vestigium aut exemplum existere. Ni-
hilominus tamen, vt seruemus ordinem
superius assignatum, etiam de Nouo
Testamento aliquid di-
cendum est.

CAPVT III.

*An Rex iure diuino Noui Testa-
menti habeat primatum
Ecclesiæ?*

1. **I**VS diuinum Noui Testamēti à Chri-
sto conditum est. Is enim, sicut vete-
res ritus, ceremonias, sacrificia, totam
denique synagogam abrogauit: ita noua
sacramenta, nouum sacrificium, nouos
ministros, nouam Ecclesiam instituit: Et
præcepta dedit, quibus omnia, quæ ab i-
pso instituta essent, legitimè gubernari &
conseruari possent. Nunc ergò quæstio
est, quid in hac tota Oeconomia sua sta-
tuerit de Primatu Ecclesiæ? An eum vo-
luerit esse apud Reges & Principes saecula-
res, an verò apud Apostolos & eorum
successores?

2. **R**E P E T O quod supra monui, hunc
Primatum consistere in exteriori Iurisdic-
tione, cuius potissimi actus sunt hi. 1. Re-
gere ecclesiam. 2. Synodos conuocare.
3. Iisdem præsidere. 4. Lites finire & con-
trouersias fidei decidere. 5. Leges & con-
stitutiones condere. 6. Contumaces ex-

communicare: aut alio modo punire delinquentes. 7. Ministros Ecclesiæ constituere & deponere. Et si qui similes. Igitur inuestigandum est, quinam hanc iurisdictionem in Ecclesia à Christo acceperint? Apostoli & eorum successores, an Reges & Principes sæculares? Id autem ex quadruplici capite inuestigari potest. 1. ex verbis CHRISTI, quibus suam mentem in hac re declarauit. 2. ex testimoniis Apostolorum, qui sine dubio CHRISTI mentē affecuti sunt. 3. ex praxi, quæ illo tempore in Ecclesia seruata est. 4. ex aliis circumstantiis.

3. Si verba CHRISTI spectemus, res in promptu est. Legamus Euangelium. Mox inueniemus Petro dictum esse, Ioan. 21. 22. *Pasce oues meas.* Et Matth 16. 18. *Tu es Petrus, & super hanc petram edificabo Ecclesiam meam, & porta inferi non praualebunt aduersus eam. Et tibi dabo clauēs regni cælorum.* Et Lucæ 22. 32. *Tu aliquando conuersus confirma fratres tuos.* At nusquam legimus, Tiberio, Pilato, vel Herodi dictum esse: *Pascite oues meas Ecclesiæ meæ primatum tenete.*

4. Et quid est, *Pasce oues meas?* Constat ex Euangelio, CHRISTVM esse Pastorem

rem

rem: Ecclesiam, ouile: Christianos, oues. Igitur tantundem est, ac si dixisset: In hoc pastoralis officio vicariam operam mihi præsta. Ouile meum tibi commendo: pascere, quotquot in eo sunt, oues. Vel clarius: Ecclesiam meam tibi commendo: dirige & gubernare fideles, quotquot in Ecclesia sunt. Vno verbo, Vicarius meus esto. Quid vnquam simile dictum est Regi vel Imperatori? Imò eos ipsos, si oues CHRISTI sunt, Petro commissos esse, necesse est, cui totum ouile commissum est. Rectè enim Epiphanius in Ancorato: *Hic est, qui audiuit, Pascere oues meas, cui creditum est ouile.* Et Eucherius Lugdunensis in Vigilia S. Petri: *Præus agnos, deinde oues ei commisit, quia non solum pastorem, sed pastorum pastorem eum constituit. Pascit igitur Petrus agnos, pascit & oues; pascit filios, pascit & matres: regit & subditos, & prælatos. Omnium igitur pastor est, quia præter agnos & oues in Ecclesia nihil est.*

5. Iam, quid aliud est, Petro, non Regi aut Imperatori, datas esse clauēs Ecclesiæ, quàm datam esse potestatem & officium gubernandi Ecclesiam! Hoc ipsa Metaphora planè significat. Et confirmat vsus.

Solent enim, qui in familia vel urbe praesunt, accipere claves in signum imperii & Jurisdictionis. Vnde Dominus apud Isaiā cap. 22. cum vellet significare, se potestatem summi sacerdotis translaturum à Sobna in Eliacim, vsus est metaphora clauium. Sic enim ait. *Vade, & ingredere ad eum qui habitat in tabernaculo, ad Sobnam prepositum templi, & dic ad eum; Quid tui hic? Expellam te de statione tua, & de ministerio tuo deponam te: & vocabo seruum meum Eliacim, & induā illum tunica tua, & cingulo tuo confortabo eum, & potestatem tuam dabo in manu eius: Et dabo clauem domus David super humerum eius: & aperiet, & non erit, qui claudat: & claudet & non erit qui aperiat.* Eadem metaphora vtitur scriptura ad significandum principatum CHRISTI, Apoc. 3. 7. *Hæc dicit sanctus & verus, qui habet clauem David: qui aperit & nemo claudit: claudit & nemo aperit.* Hinc Gregorius l. 4. epist. 32. *Cunctis Euangelium scientibus liquet, quod voce dominica, omnium Apostolorum principi Petro tuius Ecclesie cura commissæ est.* Ipsi quippe dicitur, *Tibi dabo claves regni cælorum.*

6. ET quis vsus harum clauium est? solvere & ligare: aperire & claudete, id est,

exercere triplicem potestatem: Vnam introumittendi in Ecclesiam, & eiiciendi, prout quisque meretur. Alterā, soluendi vincula peccatorum, legis, voti, iuramēti. Tertiam, ligandi per præcepta & pœnas. Vno verbo: exercere supremam iurisdictionem in domo DEI, quæ est Ecclesia.

7. Igitur ex verbis CHRISTI, perspicuè constat, Petro & eius successoribus, non item Regi commissū esse ouile, concedituras oues, concessas claues. Videamus nūc, quid Apostoli hac de re dicant. Sanè D. Paulus, tametsi nō semel, sed sæpè, de structura & regimine Ecclesiæ Christi loquatur, nusquā tamē Reges, & Principes sæculares, sed vbiq; Apostolos & Episcopos, nominare solet. Proferā tria ipsi⁹ testimonia. PRIMVM est Act. 20. 28. *Attēdite vobis & vniuerso gregi, in quo vos Spiritus sanctus posuit Episcopos regere Ecclesiā Dei.* Verba aperta sunt. Qui ergo constituti sunt præfides & Rectores Ecclesiæ Christi? Episcopi. A quo cōstituti sunt? à Spiritu sancto. Reges ergo vel constituti non sunt, vel à Spiritu sancto nō sunt. Alterū est, Eph 2. 20. *Superedificati super fundamentū Apostolorū & Prophetarū: ipso summo angulari lapide Christo Iesu*
 Hic

Hic in structura Ecclesię nullum fundamentum est, præter Christum, Apostolos & Prophetas. At si Reges ad illā structuram pertinerent, & quidem magis, quam Apostoli & Prophetę, sine dubio dicendum esset: *Superædificati super fundamentum Regum, Apostolorum & Prophetarū.* At Reges omissi sunt: & tamen structura perfecta est. TERTIVM est Eph. 4. 11. *Ipse dedit quosdam quidem Apostolos, quosdam autem Prophetas, alios verò Euangelistas, alios autem Pastores & Doctores ad consummationem sanctorum in opus ministerii in ædificationem corporis Christi.* Hic tria inspectanda sunt. 1. Ædificatio Ecclesię. 2. Opus ministerii. 3. consummatio sanctorum. Sensus ergo est: Christus volens suos fideles, qui in illum credituri sunt, perducere ad consummationem, id est, ad sanctitatem & vitam æternam: ædificauit pro iis Ecclesiam, & in ea constituit Ministros, qui fidelibus præessent, eosq; ad finem suum consequendum, docendo & gubernando iuarent. Et quos illos? Apostolos, Prophetas, Euangelistas, Pastores, Doctores. Nulla fit Regum mentio.

8. Ex his Testimoniis sic concludo. In Eccle-

Ecclesia Christi est legitimus quidam ordo, seu, ut alii vocant, dispositio & Hierarchia, in qua alii prælati, alii subditi sunt: alii Pastores, alii oues: alii in fundamento, alii supra fundamentum: alii Doctores, alii Discipuli. Vel ergo Reges includuntur in hac hierarchia, tanquam Primates, vel tanquam subditi. Si hoc posterius, salua res est. Si illud prius, necesse est, maiori potestate præditos esse, quam Apostolos & Episcopos. Nam si vel parem cum illis, vel inferiorem potestatem haberent, non rectè dicerentur esse primates Ecclesiæ. Si ergo maiorem habent, ea sine dubio à CHRISTO ipsis concessa est. At ubi & quibus verbis? Aut ubi Apostoli in suis scriptis & actis illius potestatis à CHRISTO concessæ meminerunt? In testimoniis citatis nihil inuenio. Omnes silent de Regibus: loquuntur de Apostolis. Solus Rex Angliæ cum suo Sacellano, dicit rem ita habere. *Ad vobis*, inquit Apostolus, *Verbum Dei processit? aut in vos solos peruenit?* 1. Corinth. 14. 36.

9 VENIO ad praxin Ecclesiæ, quæ tempore Apostolorum seruata est. Ea, sine

sine dubio, fallere non potest. Quis ergò tunc Ecclesiam gubernavit? Apostoli. (Act. 20. 28.) Quis primam Synodum, quæ Hierosolymis celebrata est, indixit? Apostoli. (Act. 15. 6.) Quis huic synodo cū authoritate præsedit? Apostoli. Quis sententiam dixit? Apostoli. Quis legem de abstinentia ab immolatis simulachrorum, & sanguine & suffocato sancivit? Apostoli. Quis Corinthium incestuosum excommunicauit? Paulus Apostolus (1. Corinth. 5. 3.) Quis accusationē aduersus presbyteros, tanquam legitimus Iudex admisit? Timotheus Episcopus. (1. Timoth. 5. 19.) Quis Ananiam & Saphiram in causa Ecclesiastica puniuit? Petrus Apostolus (Act. 5. 3.) Nullæ hic partes Regum; nullum vestigium.

10. DICET forte Rex, eo tempore nullos fuisse Reges Christianos, qui Ecclesiā gubernare, & hæc officia præstare potuissent. Rectè quidem. Sed nec erant Apostoli aut Episcopi Christiani, antequam CHRISTVS eos vocaret, & designaret. Sicut ergò novos Apostolos & Episcopos in noua Ecclesia instituit: cur non etiam novos Reges, qui Ecclesiæ præf-

sent? Et sicut Paulum Ecclesię persecutorem, subito in vas electionis immutauit: cur non simili modo egit cum Tiberio Imperatore, vel Herode Rege?

II. Hinc iam sumo nouum argumentũ ex circũstantiis in hunc modũ: Si CHRISTVS voluit Reges esse Primates Ecclesię, & supra Apostolos & Episcopos iurisdictionẽ exercere: cur non statim ab initio, sicut certos Apostolos elegit, sic etiam certos Reges designauit, qui Ecclesię pręsiderent? Cur non statim, sicut Apostolos instruxit, quo pacto prędicarent Euangelium, administrarent sacramenta, & Ecclesiam propagarent: sic etiã Reges edocuit, qua ratione Apostolis, & Doctoribus in regimine Ecclesiastico pręessent, synodos conuocarent, controuersias dirimerent, contumaces excõmunicarent? Cur deniq; sicut Apostolis, pręter priuatã instructionem, promisit Spiritum sanctum, cuius instinctu cætera omnia cognoscerent, quæ ad ipsorũ ministerium pertinebant: sic non etiã Regibus promisit eundem Spiritũ, qui eos in suo officio perfectius omnia edoceret? Nihil horum factũ.

12. CONCLVDO, Reges ex institutione Christi

Christi non habere Primatum Ecclesiæ, quia nec verba Christi nec testimonia Apostolorum, nec praxis primæ Ecclesiæ, nec circumstantiæ rerum, vlla ratione id significant. Omnia Apostolis & eorum successoribus patrocinantur. De illis dictum est. Act. 20. 28. *Spiritus sanctus posuit vos regere Ecclesiam Dei.* Et 1. Corinth. 4. 1. *Sic nos existimet homo, ut ministris Christi, & dispensatores mysteriorum Dei.* Et 2. Corinth. 5. 20. *Pro Christo Legatione fungimur.* Et Lucæ 10. 16. *Qui vos audit, me audit: & qui vos spernit, me spernit.* Et plura in eandem sententiam.

Obiectio.

13. Sed multa obiicit Rex Angliæ in sua Apologia, his verbis: *Quid in Novo Testamento? Omnis animæ iis (Regibus) subiici iubetur, idq; propter conscientiam. Orandum quidem & pro omnibus, sed præcipuè pro Regibus & in authoritate constitutis, ut sub iis piæ ac pacatæ, honestæq; vitæ degamus. Magistratus Dei administer est ad ulciscendos facinorosos: innocentes autem, atq; probos remunerandos. Omnibus quidem obtemperandum est superioribus potestatibus, sed potissimè prin-*

principibus, & in eminentia collocatis. Reddite unicuique, quod suum est: timorem, cui timor: amorem, cui amor iure debetur. Date Casari, quæ Cesaris sunt; Deo quæ Dei sunt. Regnum meum non est de hoc mundo. Quis me constituit iudicem super vos? Reges gentium dominantur eorum. Vos autem non sic. Haftenus Rex.

14. Sed facilis solutio Ac primū, vt generatim dicam, quod res est: Hæc testimonia, partim ad quæstionem, de qua agitur, non faciunt: partim, quatenus à Christo & Apostolis prolata sunt, pertinent ad Reges & Imperatores Ethnicos, cuiusmodi erant Tiberius, Caius, Claudius, Nero, & similes. Certeū autem est, Christū & Apostolos non voluisse suis testimoniis significare, Reges & Imperatores Ethnicos habere Primatum in Ecclesia. Qui enim sunt extra Ecclesiam, quomodo Primates sint in Ecclesia? qui ne quidem membra, quomodo caput? qui hostes CHRISTI, quomodo Vicarii?

15. Speciatim sic respondeo. Illud Rom. 13. 1. *Omnis anima potestatibus sublimioribus subdita sit; nihil omnino contra nos facit. Habet enim hunc facilem & obuium sensum; Omnis homo, qui sub potestate est, debet*

obedire suo superiori, in rebus, in quibus superior est. Quis hoc nescit? Nego autem Reges esse superiores in rebus Ecclesiasticis, ac spiritualibus. Hoc probandum erat. Ex hoc autem loco probari non potest.

16. Illud etiam 1. Timoth. 2. 2. *Orandum pro omnibus. sed præcipuè pro Regibus, & in auctoritate constitutis, ut sub iis piam ac pacatam vitam degamus; partim malè citatum, partim malè intellectum est. Non enim addit Apostolus illam particulam, præcipuè, nec illam item, sub iis; sed illis relictis, sic habet; Obsecro igitur primum omnium fieri obsecrationes, orationes, postulationes, gratiarum actiones pro omnibus hominibus: pro Regibus, & omnibus, qui in sublimitate sunt, ut quietam & tranquillam vitam agamus in omni pietate & castitate. Hinc sanè non efficitur, Reges habere Primatum in Ecclesia. Nec Apostolus eo loco præfert Reges aliis hominibus, sed equaliter de omnibus loquitur, ut patet ex sequentibus, ubi rationē reddit, cur pro omnibus orandū sit, quia, inquit, hoc acceptū est coram Salvatore nostro Deo, qui vult omnes homines saluos fieri, & ad agnitionem veritatis venire. Vnus enim DEVS, unus & mediator Dei & hominū*
homo

homo Christus Iesus, qui dedit redemptionē semetipsum pro omnibus. At Deus æquè vult omnes saluos fieri: Et CHRISTVS æquè pro omnibus mortuus est, æquè pro omnibus semetipsum tradidit. An Rex Angliæ putat, pro se magis, quàm pro Apostolis & Episcopis, mortuū esse CHRISTVM? aut Deum magis velle, vt Rex saluus fiat, quàm eius Sacellanus? Non ita est. Addo. D. Paulum ibi loqui de Regibus gentilibus, qui ad agnitionem veritatis nondum venerant. Vult enim orationes fieri pro illis, vt conuertantur, & salui fiant. At quæ hæc consequentia est; *Orandum est pro Regibus ethnicis, vt ad fidem Christi conuertantur: Ergo Reges ethnici primatum tenent in Ecclesia Christi?* Planè absurda est.

17. Illud vero, Rom. 13. 4. *Magistratus Dei administer est ad vlciscendos facinorosos:* vel vt vulgata lectio habet: *Dei minister est vindex in iram ei, qui malum agit:* nihil ad rem facit. Fatemur, Reges portare gladium, & habere potestatem puniendi peccata subditorum: & in ea re iustitiæ diuinæ ministros esse. At negamus hanc potestatem extendi ad causas & tribunal Ecclesiasticū. In hoc tribunali præsidet Apostoli & Episcopi. Illi, vt ostensū est, conuocant synodos;

sententiam dicunt; litem dirimunt; novas constitutiones sanciunt; contumaces excommunicant; & similes Ecclesiasticæ jurisdictionis actus ex officio exercent. Reges procul sunt ab hoc tribunali.

18. Eiusdem momenti est illud; *Omnibus quidem obtemperandū est superioribus, sed potissimū Principibus & in eminentia constitutis.*

Omnino sic res habet. Sed addendum est, alios esse superiores in tēporalibus; alios in Ecclesiasticis. In utroque genere reperiri Principes, quibus obtemperandum sit. In hoc quidem Pontifices: in illo autē Reges. Igitur Pontificibus potissimū obtemperandū esse in rebus Ecclesiasticis; Regib. verò in politicis. Quis hoc neget?

19. Porro ex illo Rom. 13. 7. *Reddite unicuique, quod suum est: timorem, cui timor: & amorem, cui amor iure debetur:* non video, quomodo Primatus regum in Ecclesia stabiliri possit. Non magis, quam si dicam; Reddite parentibus amorem & timorem, qui illis iure debetur: Ergo parentes sunt Primates Ecclesiæ. Cur non sic potius; Reddite Pontifici timorem & amorem, qui illi iure debetur: Ergo Pontifex est primas Ecclesiæ?

20. Iam illud, Matt. 22. 21. *Reddite, quæ sunt Cæsaris, Cæsari: & quæ sunt Dei, Deo*; omnino extra scopū est, vt ex Euangelio constat. Quærebant Iudæi à Christo, an tenerentur Cæsari Romano, qui tunc gentilis erat, tributum dare, nec ne? Christus, inspecto numismate, in quo Cæsaris effigies erat impressa, respondit: *Date Cæsari, quæ Cæsaris sunt*: id est, date illi tributum, quod ei debetur. An hinc sequitur, Cæsarem gentilem eo tempore habuisse Primatum Ecclesiæ Christi in imperio Romano? aut Christum voluisse dicere, obediendum esse gentili Cæsari in rebus ad Ecclesiam pertinentibus? Nihil minus. Nisi quis putet hanc collectionem esse legitimam; Christiani in Turcia habitantes debent Imperatori Turcarum pendere tributū, quod iure exigit: Ego debent illum agnoscere Primatem in rebus Ecclesiasticis. Hoc Angli, qui in Turcia sunt, non concesserint.

21. Multo minus ad causam facit illud, Ioan. 18. 36. *Regnū meum non est de hoc mundo*. Quid enim? An quia Christus, secundum humanitatem, non est Rex temporalis, sed spiritalis; ideo Reges temporales

habent Primatū in spiritalibus? Contrarium potius colligendum erat hoc modo; Regnum temporale distinctū est à spiritali: sicut ergo Christus & Apostoli administrant spiritale; ita Reges & Imperatores tēporale. Itemque, sicut Christus, quarex spiritalis, nō vult se immiscere regno temporali: ita Iacobus, quarex temporalis est, non debet se immiscere regno spiritali.

22. Eodem spectat illud Lucæ 12. 14. *Quis me constituit iudicem aut diuisorem super vos?* Ex quo, si aliquid concludi debet ad rē, sic debet: Christus non est constitutus aliorū Iudex in controuersis tēporalibus, qualis est, de diuidenda inter fratres hæreditate. Ergo Rex Angliæ est constitutus Iudex in spiritalibus. At quæ hæc illatio est? Iam ante dixi, sic potius inferendū esse. Christus in causa temporali dixit, *Quis me constituit Iudicem super vos?* Ergo similiter Rex Angliæ in causa spiritali debet dicere, *Quis me constituit Iudicem super vos?*

23. Deniq; illud. Lucæ 22. 25. *Reges gentiū dominantur eorū, vos autē non sic;* quid prodest ad primatū, de quo agimus? Nihil fanē. Sensus est: Reges gentiles solent esse ambitiosi, & multa per tyrannidē facere,

ac suis potius, quā subditorum commodis
studere. Vos autē (mei Apostoli) nolite eos
imitari, sed cum modestia & fraterna dile-
ctione Ecclesiā administrate, sicut & ego
facio. Eodē sensu ac spiritu dixit Petrus in
priori epistola canonica c. 5. 3. *Pascite, qui
in vobis est, gregē Dei, providentes nō coactē, sed
spontanē secundū Deum: neq; turpis lucri gra-
tia, sed voluntariē: neq; ut dominantes in cleris,
sed forma facti gregis ex animo.* Hinc iā infe-
rat Rex Angliæ, Apostoli non debent esse
ambitiosi & crudeles, sicut Reges ethnici:
Ergo Rex Angliæ tenet Primatū Ecclesiæ.
Quid absurdus? Sic potius; Christiani
non debent esse ambitiosi, more gentiliū:
Ergo Rex Angliæ, cum Christianus sit,
non debet ambire Primatum Ecclesiæ,
quem multis iam sæculis Pontifex Roma-
nus legitimē & quietē vsurpavit.

24. Ex dictis duo colliguntur. **VNUM** est,
nos ex nouo Testamēto, variis testimoniis
& argumentis perspicuē demonstrasse, Re-
ges sæculares non habere Primatum & su-
premā Iurisdictionem in Ecclesia Christi.
ALTERVM nullū testimoniū à Rege, vel
Sacellano allatum esse, quod non potius
cōtra, quā pro ipso faciat. Nunc ad ius Ca-
nonicum & ciuile transeamus. Ca-

*An Rex iure ciuili vel Canonico
habeat Primatum Ec-
clesiæ.*

1. **N**Eutro sanè. De canonico, res clara est. Multi extant Canones in contrarium. Ex iis paucos accipe. *Primus* est Nazianzeni ad Imperatores Constantinopolitanos, apud Gratianũ. d. 10. can. 7. *Libenter accipitis, quod lex Christi sacerdotali vos subiicit potestati, atque istis tribunalibus subdit. Dedit enim & nobis potestatem: dedit & principatum multo perfectiorem principatibus vestris.* Ex hoc canone tria habemus. 1. quod principatus Episcoporum sit multo perfectior, quam Regum. 2. quod Reges in rebus Ecclesiasticis, subiecti sint Episcopis. 3. quod hæc subiectio à Christo sit ordinata. Quid clarius?
2. **S**ECVNDV s est Adriani Papæ, d. 63. ca. 1. *Nullus laicorũ Principũ se inserat electioni aut promotioni Patriarchæ, Metropolitæ, aut cuiuslibet Episcopi; ne videlicet inordinata & incõgrua fiat electio, vel confusio, vel contentio: præsertim cum nullã in talibus potestatem quenguã*
pote-

potestatiuorum, vel caterorum Laicorum habere conueniat. Ex hoc canone etiam tria discimus. 1. quod nullus Princeps sæcularis (qualis est rex Angliæ) debeat se inferre promotioni aut electioni Episcoporum. Quanto minus debet præesse & præsidere? 2. quod talis electio, cui se inferit Princeps sæcularis, sit inordinata, & confusa. 3. Quod in similibus causis Ecclesiasticis nullam potestatem habeat Princeps sæcularis. Multo minus Primatum.

3 TERTIVS est, ex 6. Synodo. act. 2. distin. 63. can. 7. *Omnis electio Episcopi à Principibus facta, irrita maneat, secundum Regulam, quæ dicit: Si quis Episcopus, sæcularibus potestatibus usus, Ecclesias per ipsos obtinuerit, deponatur: & segregentur ab Ecclesia omnes, qui illi communicant.* Sanè secundum hunc canonem, omnes Episcoporum electiones irritæ sunt in Anglia, quotquot à Rege factæ sunt. Vbi ergo Primatus Regis in causis Ecclesiasticis?

4. QVARTVS est Gregorii ad Hermanum Episcopum Metensem, d. 96. can. 9. *Quis dubitet sacerdotes Christi, Regū & Principum omnium fidelium Patres & Magistros censerī? Nonne miserabilis insaniæ esse cognoscitur,*

scitur, si filius patrem, discipulus magistrum sibi conetur subiugare, & iniquis obligationibus illum sua potestati subicere, à quo credit, non solum in terra, sed etiam in cœlis se ligari posse & solui? Omnino sic res habet. Miserabilis infania est, Reges sæculares usurpare sibi Primatū in Ecclesia, & subiugare sibi Episcopos, quorum filii & discipuli esse debent.

5. QUINTVS est Gelasii Papæ ad Anastasium Imperatorem, d. 96. can. 10. *Duo sunt, Imperator Auguste, quib. principaliter hic mundus regitur, authoritas sacra Pontificum, & regalis potestas. In quibus tanto grauius est pondus Sacerdotum, quanto etiam pro ipsis Regib. in diuino sunt reddituri examine rationē. Et infra; Nosti itaq. ex illorum te pendere iudicio, non illos ad tuam redigi posse voluntatem. Facto quidem possunt; iure non possunt.*

6. SEXTVS est Ioannis Papæ dist. 96. can. 11. *Si Imperator Catholicus est: filius est, nō Præsul Ecclesie. Quod ad religionē competit, discere ei conuenit nō docere. Et paulo post: Ad Sacerdotes. n. Deus voluit, quæ Ecclesie disponenda sunt, pertinere, nō ad sæculi potestates: quas, si fideles sunt, Ecclesie suæ Sacerdotibus voluit esse subiectas. Et infra: Imperatores Christiani subdere*

subdere debent executiones suas Ecclesiasticis Præsulibus, non præferre. Igitur, si Rex Angliæ Catholicus est; filius est, non Præsul Ecclesiæ. Si fidelis est; Ecclesiæ sacerdotibus subiectus est. Si Christianus est; debet se subdere Episcopis, non præferre.

7. SEPTIMVS est Marcelli Papæ, II. q. I. c. 1. 3. *Clericū cuiuslibet ordinis, absq; Pontificis sui permissu, nullus præsumat ad secularem iudiciū trahere. Nec laico quenquā clericū liceat accusare. Nimirū clerici pertinent ad tribunal Ecclesiasticum, non ad politicum seu civile. Vnde recte Valentianus, Theodosius, & Arcadius Imperatores; Continua lege sancimus, vel nullus Episcoporum, vel eorū, qui Ecclesiæ seruiunt, ad iudicia iudicum protrahatur. Habent enim illi suos iudices.*

8. OCTAVVS est Greg. ad Mauritiū Impe. II. q. I. can. 40 *In diuinis eloquiis Sacerdotes aliquādo Dii, aliquādo Angeli vocātur. Et paulo post; Quid igitur mirū, si illos vestra Pietas dignetur honorare, quib. in suo eloquio honorem tribuēs, eos aut Angelos, aut Deos ipse ēt appellat De⁹? Vide, q̄ supra dicta sunt. c. 2. n. 53. & 57.*

9. NONVS est Innocentii 3. in Decretalibus, de maiestate & obediētia, can. 6. *Nō negamus, quin præcellat Imperator in temporalibus,*

ralibus, illos duntaxat, qui ab illis accipiunt temporalia: sed Pontifex in spiritualibus excellit quæ tanto sunt temporalibus digniora, quanto anima præfertur corpori. Et infra; Nosse debueras, quod fecit Deus duo luminaria magna in firmamento cæli: luminare maius, ut præesset diei, & luminare minus, ut præesset nocti. Vtrumq; magnum, sed alterum maius. Ad firmamentum igitur cæli, hoc est, vniuersalis Ecclesiæ, fecit DEVS duo magna luminaria, id est, duas instituit dignitates, quæ sunt, Pontificalis auctoritas, & Regalis potestas. Sed illa, quæ præest diebus, id est, spiritualibus, maior est: quæ verò carnalibus, minor: ut quanta est inter Solem & Lunam, tanta inter Pontifices & Reges differentia cognoscatur.

10. Sufficiant hi pauci Canones. Nam plures citare, fortasse superuacaneum est: præsertim cum probabile sit, Regem Angliæ non tanti eos facere, ut eorum iudicio stare velit. Quanquam immerito. Omnes enim Cathedræ Academicæ in Anglia, in quibus Iuris vtriusque Doctores antiquo ritu legitimè promouentur, non minorem iuris Canonici, quàm ciuilis auctoritatem esse, luculento testimonio sunt.

II. Exiure ciuili occurrit illud Iustiniani Imperatoris, in Authentica constit. 123. *Si Ecclesiasticum negotium sit, nullam communionem habento ciuiles magistratus cum ea disceptatione, sed religiosissimi Episcopi secundū sacros Canones finem imponunto.* Præclara constitutio. Decernit Imperator politicos & sæculares Principes non debere adesse, multo minus præsidere, in negotiis & disceptationibus Ecclesiasticis. Quare? quia vult in ea re seruari sacros Canones, quibus cautum est, vt Episcopi, non autem Principes, tractent controuersias ad Ecclesiam pertinentes. Si Rex Angliæ cā mente esset, quā hic Imperator fuit, sine dubio, Primatum Ecclesiæ Episcopis relinqueret, non sibi arrogaret. Plura in hanc sententiam vide in seq. cap.

CAPVT V.

An Rex, consensu doctorum hominum habeat Primatum Ecclesiæ?

- I. EXCEPTO Sacellano, & quibusdam aliis adulatoribus, reclamāt omnes corda-

cordati & docti viri: Episcopi, Pontifices, Reges, Imperatores, alii. Seligam paucos; nemolestus sim; & incipiam à primitiua Ecclesia.

2. S. I G N A T I V S, Ioannis Euāgelistæ discipulus, in Epistola ad Philadelphienſes, sic habet. *Principes subditi estote Cæsari, milites Principibus, Diaconi Presbyteris: Presbyteri verò & diaconi, atq; omnis clerus, simul cum omni populo, & militibus, atq; Principibus, sed & Cæsare obediant Episcopo: Episcopus verò Christo, sicut Patri Christus: & ita unitas per omnia seruetur.* Vox digna viro Apostolico. Omnes, inquit, obediant Episcopo. Etiamne Cæsar? Omnino. Quidni & Rex?

3. HOSIVS Cordubensis Episcopus, qui interfuit primo Concilio Nicæno, Constantinum Imperatorem sic affatus est; *Desine quæso Imperator, ne te misceas Ecclesiasticis, neq; nobis in hoc genere præcipe, sed potius ea à nobis disce. Tibi Deus imperium commisit, nobis, quæ sunt Ecclesiæ, concredidit. Et quemadmodum, qui tuum Imperium malignis oculis carpit, contradicit ordinationi diuinæ: ita & tu caue, ne quæ sunt Ecclesiæ, ad te trahens, magnè criminis obnoxias fias.* Refert hæc verba Atha-

Athanasius in epistola ad solitariam vitam agentes.

4. S. AMBROSIVS epist. 33. ad Marcellinā sororem suam, scribit se Valentiniano Imperatori dixisse; *Nolite gravare Imperator, ut putes te in ea, quæ diuina sunt, imperiale aliquod Ius habere. Noli te extollere, si vis diutius imperare. Esto Deo subditus. Scriptum est enim, quæ Dei, Deo; quæ Caesaris, Cesari. Ad Imperatorem palatia pertinent: ad Sacerdotem, Ecclesiæ. Publicorum tibi mœnium Ius commissum est, non sacrorum.* Idem planè Ambrosii, qui & Hosii, spiritus; eadem dicendi libertas; idem zelus. Utinam Sacellanus, & similes, qui in Anglia sunt, eodem spiritu, in simili causa vterentur. Sed pauent; nec expendant illud Christi, apud Matth. 10. 19. *Cum steteritis ante Reges, nolite cogitare, quomodo aut quid loquamini Dabitur enim vobis in illa hora, quid loquamini. Non enim vos estis, qui loquimini, sed Spiritus Patris vestri, qui loquitur in vobis.*

5. Hosio & Ambrosio, in ea re, similis est ATHANASIVS (magnæ apud Regem Angliæ authoritatis) qui in Epistola citata, grauiter reprehendit Constantium Imperatorem, quod Ecclesiasticam Iurisdic-

risdictionem sibi vsurparet, ideoque eum vocat *Antichristum*, *Apostatam*, *fidei desertorem*, *canem*, *carnificem*, *filium perditionis*, *pestem*, *belluam*, quæ ex membris humanis & animo ferino conflata est. Eundem cum Achabo, Antiocho, & Herode comparat, asserens malorum omnium esse voraginẽ & gurgitem, omnis impietatis caput, hæreticorum incitamentum, acerbitalis radicem, blasphemix propugnatorem, religionis euerforem, & quæ similia sunt. Addit denique inauditum esse, quod Reges & Imperatores misceant se causis ad Ecclesiam pertinentibus, & inter alia sic habet: *Quando à condito ævo auditum est, quod iudicium Ecclesiæ; authoritatem suam ab Imperatore accepit? aut quando vnquam hoc pro iudicio agnitum est? Plurimæ antea Synodi fuere, multa iudicia Ecclesiæ habita sunt: sed neq. Patres istiusmodi res Principi persuadere conati sunt, nec Princeps se in rebus Ecclesiasticis curiosum præbuit.*

6. Conspirant alii Patres. S. MARTINVS Turonensis Episcopus, Maximo Imperatori in faciem dixit; *Novum esse & inauditum nefas, quod causam Ecclesiæ, Index sæculi indicaret: ut est apud Sulpitium lib.*

2. sacræ historię in fine. Et *Leontius* Episcopus Tripolitanus, teste *Suida*, ad *Constā-
tium* Imperatorem; *Miror, quomodo ad alia
vocatus, aliis rebus te immisceas. Militaribus
enim & politicis rebus præfectus, in his, quæ ad
solos Episcopos pertinent, præesse vis.* Et *Cyri-
lus Hierosolymanus* catechesi 17. *Ad hodi-
ernam usque diem cernimus mundanos Prin-
cipes regi & instrui ab Ecclesiasticis.* Omitto
reliquos.

7. Nec alia Regum & Imperatorum fuit
sentētia. Submiserūt se Episcopis & Pon-
tifici; neq; causas Ecclesiasticas ad se per-
tinere arbitrati sunt. *VALENTINIANVS*
senior Imp. cum importunè rogaretur, vt
permitteret haberi Concilium, in quo de
quibusdam rebus fidei decerneretur, re-
spondit: *Mihi, qui vnus è numero laicorum
sum, non licet; eiusmodi negotiis me interpone-
re. Sacerdotes & Episcopi, quibus hæc cura sunt,
vbicunq; ipsis liberam fuerit, conueniant.* Re-
fert *Sozomenus* lib. 6. histo. cap. 7. *Nice-
phorus* lib. 11. c. 30. *Ruffinus* libr. 1. c. 2. *Bar-
ronius* tom. 4. *Annalium* anno 364.

8. Eodem sensu & affectu *THEODOSI-
VS* Iunior in Epistola ad synodum Ephe-
sinam; *Candidianum Comitem* ad hanc sa-

eram vestram synodum abire iussimus: sed ea lege & conditione, ut cum questionibus & controuersis, quæ circa fidei dogmata incidunt, nihil quicquam commune habeat. Nefas enim est, qui sanctissimorum Episcoporum catalogo adscriptus non est, eum Ecclesiasticis negotiis & consultationibus se immiscere.

9. BASILIUS Imperator in oratione, quam habuit in octaua synodo generali, quæ tempore Adriani Papæ, Constantinopoli celebrata est, in causa Photii Patriarchæ; *De vobis autem laicis, tam qui in dignitatibus, quam qui absolutè versamini, quid amplius dicam, non habeo, quam quod nullo modo vobis licet de Ecclesiasticis causis sermonem mouere, neque penitus resistere integritati Ecclesiæ, & vniuersali synodo aduersari. Hæc enim inuestigare & quarere, Patriarcharum, Pontificum, & Sacerdotum est, qui regiminis officium sortiti sunt, qui sanctificandi, ligandi, & soluendi potestatem habent: qui Ecclesiasticas adepti sunt clauēs: non nostrum, qui pasci debemus, qui sanctificari, qui ligari, vel à ligamentis solui egemus. Nihil clarius dici potuit. Nimirum intellexit Imperator, non Reges, sed Episcopos, Ecclesiæ regimen sortitos esse; ideoque non illos,*
sed

sed hos oportere statuere, quæ ad controuersiam Ecclesiasticam inter Photium & Ignatium spectare putabantur.

10. Simile exemplum habemus in Constantino Magno, qui, cum Donatistæ non contenti Episcopali iudicio, ad ipsū causam Ecclesiæ detulissent, ita exclamasse fertur; *O rabida furoris audacia. Sicut in causis gentilium fieri solet, appellationem interposuerunt.* Ira refert Optatus Mileuitanus lib. 1. contra Parmenianum. De eodem Imperatore scribit August. epist. 165. *Constantinus non est ausus de causa Episcopi iudicare.* An Rex Angliæ maior Constantino? Sacellanus ita vult.

CAPUT VI.

*An Rex titulo præscriptionis
habeat Primatum
Ecclesiæ?*

1. **H**Oc planè videtur ipse velle. Nam in *monitoria præfatione* disertè ait; aliquos ex suis antecessoribus vsurpasse Primatum Ecclesiæ in Anglia: neque passos esse, vt Pontifex vllam iurisdictionem

ibi exerceret, sed ipsos eam sibi vindicasse. Itaque nihil noui se facere, eundem Primatum vsurpando.

2. Sed valde friuolum hoc est. Nam si sic liceret argumentari, facile erit omnes pene abusus excusare. Ostendam simili exemplo. Rex ACHAZ in Veteri Testamento, colebat falsos DEOS, & veri DEI cultum negligebat 4. Reg. 16. 3. QVÆRAM, an rectè id fecerit, nec ne? Dicet rectè se fecisse: & sic probabit. *Aliqui ex meis antecessoribus coluerunt falsos deos: Ergo nihil noui à me fit. Iure igitur facio.* Quid absurdus? Et tamen sic agit Rex Angliæ: Ostendit paucos è multis, qui obedientiam Pontifici recusarunt; & eorum exemplo inobedientiam suam excusari vult. Sed frustra. Cùm enim Ius diuinum clarum & liquidum est, quid prodest in contrarium niti, etiamsi infinita in contrarium proferantur exempla? At supra ostensum est, Ecclesiæ Primatum ad Episcopos, non autem ad Reges, diuino iure pertinere. Hoc ius nullâ præscriptione, nulla consuetudine humana aboleri potest. AD DEO, qui homine maior est, vim suam habet.

Ergò

Ergò quamdiu DEVS vult, vim suam retineat, necesse est.

3. ADDO, si ex factis Regum volebat argumentari Rex, sic potius cōcludendum ei erat: *Multiples ex meis antecessorib. venerati sunt auctoritatem Pontificis, quàm respuerunt: Ergo & ego venerarieam volo, non respuere.* Nec dubium, quin ita sit. Testes sunt Lucius; Eduinus, Osvaldus, Sigbertus, Penda, Ina, Eduardus, Henricus 2. & complures alii. Extant illorum acta. Ex iis hæc accipe.

4. EDVARDVS in epist. ad Nicolaum 2. Pontificem, circa annum Christi 1060 ita scribit: *Summo vniuersalis Ecclesie Patri Nicolao, Eduardus gratia Dei Anglorum Rex debitam subiectionem & obedientiam.* Pauca, sed ponderosa verba. Agnoscit illum *Patrem*; & quidem *summum Patrem*: nec vnus alicuius particularis, sed *vniuersalis Ecclesie Patrem*. Quid amplius? Debitam subiectionem & obedientiam illi promittit. An hoc faceret, si supra Pontificem putaret esse Regiam maiestatem?

5. Nec aliter HENRICVS 2. in epistola ad Alexandrum 3. quæ habetur apud Petrum Blesensem Secretarium, epist. 136.

Vestra, inquit, magnitudini promitto, me vestra dispositioni in omnibus pariturum. Itemque; DEVS extulit vos in eminentiam officij pastoralis, ad dandam scientiam salutis plebi eius.

6. Regem Regina imitata est, pari animo, pari subiectione. ALEONORAM dico, Henrici Regis vxorem. Scripsit illa tres epistolas ad Cœlestinum Papam, in quibus vocat eum *Principem Sacerdotum, Vicarium crucifixi, successorem Petri, Christum Domini, DEVM Pharaonis, orbis Episcopum.* Et inter alia sic addit; *Non Rex, non Imperator à iugo vestra iurisdictionis eximitur.* Et rursum; *Christi crux antecellit Caesaris Aquilas: gladius Petri gladio Constantini, & Apostolica sedes præiudicat Imperatorie potestati.* Quid clarius? Extant hæ Epistolæ apud eundem Blesensem, Epist. 144. 145. & 146.

7. Hinc iam satis apparet, quid olim senserint Reges Angliæ de primatu Romani Papæ. Ausim addere, vix ullos in orbe Christiano extitisse Reges, qui tam bene de Pontifice meriti sint, quàm Anglicani. Parum putarunt, si in Ecclesiastico regimine illi parerent. Ipsum regnũ, etiam in temporalibus, feudatarium illi
 fecce-

fecerunt. Fatetur hoc Henricus 2. in Epist. ad Alexandrum 3. iam citata, his verbis; *Vestræ Iurisdictionis est regnum Angliæ: & quantum ad feudatarij iuris obligationem, vobis duntaxat obnoxius teneor & obstringor.*

8. Multò fufius id persequitur Polydorus Virgilius libro 4. historiæ Anglicanæ, vbi de IN A Rege sic scribit: *Officia eius Regis, pietatis plena, infinita produntur: & illud imprimis, quod Regnum suum Romano Pontifici vectigale fecerit, singulis argenteis nummis, quos denarios vocant, in singulas domos impositis. Fecit idem, eius exemplo, ut opinor, ductus, Offa Merciorum Rex, qui non multo post id tempus regnavit. Fuit is annus salutis circiter 740. Hoc vectigal, prout quidam scribunt, auxit postea Atulphus Rex, qui ut proximo libro demonstrabitur, totius serè Insule imperium tenuit. Omnis Anglia hoc tempore (nimirum sub Henrico 8.) istuc vectigal pietatis & religionis causa, Romano Pontifici pendit domesticatim collatum, & nummi illi argentei vocantur vulgo denarij D. Petri, quos Pontificius quæstor, quem non inscienter collectorem nuncupant, exigit. Nos hanc olim quæsturam aliquot per annos gessimus, eiusq̃*

*muneris obeundi causa, primum in Angliam
venimus.*

9. Magnum testimonium. Ex quo colligimus, Reges Angliæ, non alia, quam pietatis & religionis causa, suum regnum fecisse Pontifici vectigale. Sanè si REX IACOBVS volebat suorum antecessorum vestigiis insistere: cur hos Reges, qui à pietate & religione commendantur, imitatus non est? cur, inquam, ab horum pietate & religione tam longè abcedit? Cur, cum illi, tam in temporalibus, quàm Ecclesiasticis, Pontifici se submitterent; ipse in vtrisque illum abiicit & contemnit? Et quod magis mirum est, cur aliis quoque Regibus, vt idem faciant, conatur persuadere?

10. EX DIC TIS sic infero: si in hoc negotio, præscriptioni locus esset, ea nobis potius faueret, quam Regi. Ab antiquis enim temporibus, vt iam ostensum est, vsq; ad Henricum 8. Elisabethæ parentem, tota Anglia quotannis solita est Romano Pontifici dare vectigal, in recognitionem supremæ ipsius Iurisdictionis ecclesiasticæ: Ergo hoc suo facto, tam longa consuetudine præscripto, satis testatur, Pontificem

cem esse Primatem Ecclesiæ vniuersalis,
atque adeo Anglicanæ.

CAPVT VII.

*An Rex ex propria doctrina
possit Primatum suum
defendere?*

I. **I**Nuenio duo principia in libello Re-
gis, quæ si vera sunt, Primatum suum
tueri non potest. VNUM est (in quo con-
uenit cum Bellarmino) quod, qui habet
Primatum Ecclesiæ, possit creare & de-
ponere Episcopos: dare illis iurisdictionē
& auferre. Vnde Bellarminus, quia vult
Pontificem habere primatum totius Ec-
clesiæ, consequenter dicit, Pontificem in
tota Ecclesia posse id facere. Rex vero,
quia putat vnumquemque Regem in suo
regno, & Imperatorem in suo Imperio,
habere primatum Ecclesiæ: consequen-
ter dicit, vnumquemq, Regem in suo re-
gno, & Imperatorem in suo Imperio pos-
se creare Episcopos & deponere: dare
iurisdictionem & auferre. Quod autem
Rex Angliæ ita sentiat, patet ex ipsius

verbis. Sicenim habet in monitoria præfatione: *Primum illud videamus, quàm longè Imperatores atque Reges, qui superioribus sæculis religiosè Christianeq; vixerunt, ab eo abfuerint, ut Ius in se aliquod Pontifici esse crederent: cùm contrà, Papas ipsi creauerint, in ordinem redegerint, adeoq; de sede deiecerint.* Quibus verbis conatur ostendere, Pontifices olim non habuisse Primatum Ecclesiæ suprà Reges & Imperatores: sed hos potius habuisse supra illos. Quare? quia potuerunt creare, in ordinem redigere, & de sede deicere Pontifices. Et paulò post: *Sed & per ætates complurimas certum ius ac inuiolatum apud Imperatores mansit, Romanos Pontifices creandi.* Et in Apologia id confirmat exemplo Regum Veteris Testamenti, qui, inquit, *exauthorauerunt summum Pontificem, aliumq; in eius locum subrogauerunt. In summa, cuncta moderatè sunt, quæ ad Ecclesiasticum regimen quoque modo pertinuerunt. Eodem modo loquitur Sacellanus Regis in Tortura Torti. Ad regem, inquit, pertinet, Pontificem exauthorare, & in locum Abiathari Sadocum surrogare. Facit hoc, credo, ad primatum Regis.*

2. Alterum Principium Regis est (in quo dissentit, non solum à Bellarmino, sed etiam à seipso, vt videbimus) quod Episcopi omnem suam iurisdictionem immediatè accipiant à Deo. Sic enim habet in monitoria præfatione: *Episcopos esse in Ecclesia debere, tanquam Institutionem Apostolicam, ac ordinationem: proinde diuinam; contra Puritanos, contraq. Bellarminum semper sensi, qui negat Episcopos à DEO immediatè suam Iurisdictionem accepisse. Sed nihil mirum, à Puritanis eum stare, cum Iesuitæ nihil aliud, quàm Puritanopapista sint.* Hic duo obiter notanda sunt. Vnum est, quod sermo sit de Iurisdictione exteriori, de qua etiam quæstio nostra est. Hanc enim Bellarminus vult immediatè conferri à Pontifice; non autem potestatem ordinis, vel Iurisdictionis interioris, vt patet l. 4. de Pontifice cap. 24. & 25. Alterum est, quod Bellarminus, cum agitur de hac iurisdictione Episcoporum, nullo modo consentiat cum Puritanis, vt hic falso illi affingitur. Nam Puritani duo docent. 1. Hanc iurisdictionem conferri à populo vel magistratu sæculari. 2. *Æqua-*

Æqualem esse in Episcopis & aliis Ecclesiæ ministris. Tollunt enim omnem ordinum distinctionem, & hierarchiam Ecclesiasticam; & in omnibus volunt esse æqualitatem & paritatem. Hoc fatetur Rex in monitoria præfatione, his verbis; *Et quo studio in Episcoporum & Ecclesiasticæ hierarchiæ defensionem semper incubui, eodem in confusam illam Anarchiam & Parilitatem Puritanorum inuectus sum.* Et infra; *Egone Puritanus, qui suam Episcopis dignitatem restitui, & æqualitatem illam popularẽ repressi?* At Bellarminus in utroque puncto ab iis dissidet. Nam PRIMÒ, non vult iurisdictionem Ecclesiasticam conferri à populo, vel magistratu sæculari: sed immediate à Pontifice, mediatè verò à Deo, vt disertè fatetur lib. 4. de Pontifice c. 25. in solutione quartæ obiectionis. *Vtrumq; inquit, tam ordo, quam iurisdictio, à Deo confertur: sed ordo immediate, iurisdictio mediate.* SECUNDO, vult Episcopos in hac potestate & iurisdictione, superiores esse aliis Sacerdotibus, qui Episcopi non sunt; & quidem iure diuino. Sic enim habet lib. 1. de Clericis ca. 14. *Ecclesia Catholica distinctionem agnoscit, & docet iure diuino*
Episco-

Episcopatum presbyterio maiorem esse, tum ordinis potestate, tum etiam Iurisdictione. Et hoc probat autoritate Concilii Tridentini, & variis argumentis. Itaque toto, quod aiunt, cœlo distat à Puritanis. Sed hæc obiter. Nunc ad rem.

3. Ex his ergo duobus principiis, quæ ex libello Regis desumpta sunt, conficio hunc syllogismum, contra Regem: Qui habet Primatum Ecclesiæ, potest dare & auferre Iurisdictionem Episcopalem, quibus vult, iuxta secundum Principium: At Rex Angliæ non potest dare & auferre Iurisdictionem Episcopalem, quibus vult: Ergo Rex Angliæ non habet Primatum Ecclesiæ in Anglia. Minorem probo ex primo principio, quia Episcopi omnem suam iurisdictionem accipiunt immediate à Deo: Ergo non accipiunt illam immediate à Rege: Ergo Rex non potest illam immediate dare: Ergo nec auferre.

4. Hinc duo infero. PRIMVM est, quod Rex sibi ipsi contrarius sit. Nam vno loco dicit, iurisdictionem Episcopalem immediate accipi à Deo: altero, eandem dari & auferri immediate à Rege; quæ duo non cohærent. Vel ergo Rex non potest

test illam dare & auferre; & sic non habet primatum Ecclesiæ: vel si potest, falsum est, quod contra Bellarminum dixit, Iurisdictionem Episcopalem immediatè à Deo conferri. Posterius est, quod Bellarminus, quem Rex oppugnat, consequenter locutus sit; quod Rex facere non potuit. Dixit enim Pontificem habere Primatum Ecclesiæ, & posse dare & auferre Iurisdictionem Episcopalem. Dixit etiam hanc Iurisdictionem esse quidem à Deo, non tamen immediatè ab eo conferri, sed mediante Pontifice. Hæc autem optimè cohærent.

5. Ex omnibus, quæ hæcenus disputata sunt, ita concludo; Rex Angliæ, nec iure naturali, nec iure diuino Veteris Testamenti, nec iure diuino Noui Testamenti, nec iure ciuili aut canonico, nec consensu doctorum hominum, nec titulo legitimæ præscriptionis, nec ex principis propriæ doctrinæ, potest habere Primatum Ecclesiæ in Anglia: Ergo nullo modo potest eum legitimè habere. Faceffant igitur Sacellanus & similes adulatores, qui contrarium illi persuadent.

CAPVT VIII.

Quod sit ergo officium Regis circa Ecclesiam?

1. **O** Stendi hæctenus prolixè, Reges & Principes sæculares non habere Primatum seu iurisdictionem exteriorem in Ecclesia, ac proinde sua autoritate nō posse Ecclesiam regere, synodos conuocare, lites & controuersias fidei dirimere, Ecclesiæ ministros creare vel deponere, contumaces excommunicare; sed hæc omnia ad Episcopos & Ecclesiæ prælatos diuino ac humano iure pertinere. An igitur Regibus in regimine Ecclesiastico nihil reliquum est? An planè ab hac cura exclusi & immunes sunt? Dicam paucis, quod res est: & dabo Cæsari, quæ Cæsaris sunt: Deo, quæ Dei.

2. AC PRIMVM illud statuendum est contra Politicos, Reges & Principes Christianos non ita debere sua regna ac prouincias administrare, vt omnem religionis & Ecclesiæ curā abiiciant, tanquā nihil ad se pertinentem, & vsurpent illud Donatistarū: *Quid Imperatori cum Ecclesia?*
quod

quod tantopere reprehendit Augustinus lib. 2. contra literas Petiliani cap. 92. Hoc enim & sacris literis, & bonorum Regum exemplis, & rationi ipsi contrarium est. Laudantur in sacris literis David, Ezechias, Iosaphat, Afa & Iosias, quod cultum ac religionem Dei, vel promouerint, vel restaurarint. Eorum exemplum in nouo Testamento imitati sunt Constantinus Magnus, Thedofius, Arcadius, Honorius, Carolus Magnus, Ludouicus, & alii. Contra verò, non solum reprehensi, sed etiam puniti sunt, qui religionem & fidem contempserunt, vt Ieroboam, Achab, Achaz, Amon. Et ratio est, quia Reges, qui in sublimi potestate positi sunt, sicut ipsi ab inferioribus iure honorantur; sic Deum ipsum, à quo potestatem consecuti sunt, & cui iure naturæ subiiciuntur, merito honorare debent, & ipsius gloriam ac maiestatem vbique propagare. Vnde AGAPITVS ad Iustinianum Imperatorem: *Honore quolibet sublimiorem cum habeas dignitatem, O Imperator: honora super omnes, qui hac te dignatus est, DEVM: quoniam iuxta similitudinem cœlestis regni, tradidit tibi sceptrum terrena potestatis, vt homines edoceres*

*doceres iusti custodiam, & eorum, qui quasica-
nes aduersus ipsam rabiunt, insectareri latra-
tum, tum ipsius obtemperando legibus, tum
subditos tibi regendo pro iure.*

3. SECUNDO statuendum est, eosdem Reges & Principes Christianos, nullo modo in suis regnis ac prouinciis debere admittere libertatem fidei ac Religionis, si impedire eam possint. Hæc enim libertas planè illicita, & Christianæ doctrinæ contraria est. Nam vt alibi dixi, multa in Euangelio sunt, ex quibus constat, CHRIS-
TVM vnā fidem mandasse; variā ac multiplicem prohibuisse. Ac PRIMO, voluit vnā tantum esse Ecclesiā, vnum ouile, vnum pastorem, vnum baptismum. Hæc autem sine vnitate fidei consistere non possunt. SECUNDO, voluit discipulos suos attendere à falsis prophetis: at in multiplici religione necesse est, alios esse veros, alios falsos prophetas. Ergo, si hi excludendi sunt; fides vna retinenda est, varia explodenda. TERTIO, voluit Ecclesiam suam esse perpetuam, cui omnes inferiorum potestates resistere non possint. At perpetua esse non potest, si vna omnium fides non sit; quod ipse testatur

Lucæ 11. 17. *Omne regnum in seipsum diuisum desolabitur.* Apostoli disertis verbis idem confirmant. Rom. 16. 17. *Rogo autem vos fratres, ut obseruetis eos, qui dissensiones & offendicula, præter doctrinam, quam vos dedicistis, faciunt; & declinate ab illis.* Galat. 1. 8. *Licet nos aut Angelus de cælo Euangelizet vobis, præterquam quod euangelizauimus vobis, anathema sit.* 1. Corinth. 1. 10. *Obsecro vos fratres, ut id ipsum dicatis omnes, & non sint in vobis schismata.* 1. Corinth. 14. 33. *Non enim est dissensionis DEVS, sed pacis.* Ephes. 4. 5. *Vnus dominus, Vna fides, Vnum baptisma.* Heb. 13. 9. *Doctrinis variis & peregrinis nolite abduci.* Vides, quam seriò, quam sollicitè & grauitèr hortetur Apostolus, ut vnitatem fidei retineamus. Quod non faceret, si libertas indulgeri possit. Plura in hanc sententiam dicta sunt in Disputatione, *De fide hæreticis seruanda*, ca. 10. Nunc illud solum addo ex Augustino epist. 66. *Quæ est peior mors animæ, quam libertas erroris?*

4. Quid ergo facient Reges circa Ecclesiam & religionem, si neque curam illius omnino reiicere, nec etiam libertatem indulgere possunt? Dicam verbo.

Debent

Debent illam tueri ac defendere, non vt *Domini*, sed vt *ministri* : neque vt *Iudices*, sed vt *executores*. Hoc olim fecerunt Christiani Principes: Hoc verbo testati sunt. *Carolus Magnus*, vt alios omittam, apud Sigonium l. 4 de regno Italiæ, sic ait; *Si Ecclesiarum Dei seruis magnificentiam nostram impertimus, eorumq; studiis libenter obsequimur: id nobis ad Augustalis excellentie culmen proficere credimus*. Si, inquit, obsequimur Ecclesiarum Dei seruis. Obsequium offert; non arrogat sibi primatum. Vult esse *minister* in defensione Ecclesiæ, non *Dominus*.

5. Idem *Carolus*, cum à Leone Papa coronam Imperii accepit, hac formula iurisiurandi vsus est; *In nomine Christi spondeo atque polliceor ego N. Imperator coram Deo & B. Petro Apostolo, me protectorem ac defensorem fore huius sanctæ Romanæ Ecclesiæ, in omnibus, quatenus diuino fultus fuero adiutorio, prout sciero poteroq;.* Refert Sigonius loco citato.

6. Et iam pridem vsu receptū est in *Francia, Hispania, Anglia, Polonia, Hungaria*, vt simili iuramento obstringant se Reges,

& nominatim promittant, defensuros se Ecclesiam ac religionem, eiusq; prælatis debitam reuerentiam & subiectionem præstituros. Neq; hoc quicquam derogat ipsorum maiestati: imo per honorificum est. Rectè AMBROSIVS epist 32. ad Valentinianum Iuniorem; *Quid est, inquit, honorificentius, quam ut Imperator dicatur filius Ecclesiæ? Imperator enim bonus, intra Ecclesiam, non supra Ecclesiam est.* Et Theod. Italiæ Rex ad Ioannem Pontificem: *Sum quidem Iudex Palatinus, sed vester non desinam esse discipulus. Nam tunc ista rectè gerimus, si à vestris regulis minimè discedamus.*

7. Non ibò longius in hoc genere. Satis, opinor, iam constat, quam curam circa Religionis & Ecclesiæ defensionem habere debeant Reges & Principes sæculares. Hoc addo, non deesse exempla huius rei, etiam hoc tempore, præsertim in Francia, Hispania, Polonia, Belgio, Germania, Italia.



Secunda Pars Refutationis.

DE ERRORIBVS
ET PARADOXIS REGIS
Angliæ.

REx in monitoria præfatione, *Catholica fidei defensorem* se appellat : quo titulo HENRICVS octauus, propter defensam contra Lutherum Ecclesiam Romanam, à LEONE Pontifice ornatus fuit. At quo iure, IACOBVS, Henrici successor, eundem sibi vendicet, non video. Primo, quia longe aliter agit, quam Henricus. Non enim defendit Romanam Ecclesiam contra Lutherum, vt ille : sed eam cum Luthero oppugnat. Secundo, quia in sua præfatione, vbi hunc titulum vsurpat, multos habet errores circa fidem, multa paradoxa. **ERRORES** sunt hi. I. Damnamdam esse intercessionem Sanctorum, Missam priuatam, communionem sub vna specie, Transubstantiationem, adoratio-

nem Christi in Eucharistia, thesaurum Ecclesię. 2. Reliquiarum & imaginum cultum esse intolerabilem idololatriam. 3. Nullum esse Purgatorium, nec satisfactiones pro defunctis. 4. Petrum non fuisse Vicarium Christi, nec habuisse primatum Ecclesię. 5. Papam esse Antichristum. 6. Veram crucem Christi, in qua ipse pependit, non esse adorandam. De his & similibus, quia sæpè à nostris refutati sunt, nihil dicam.

2. PARADOXA sunt hæc. 1. Spiritum sanctum esse Vicarium CHRISTI. 2. Regem esse Vicarium Dei, tam in Ecclesiasticis, quam in temporalibus. 3. Henoch & Heliam ante CHRISTI aduentum fuisse in cœlo cum corporibus glorificatis. 4. Non habendos esse pro Christianis, qui credunt Henoch & Heliam ab Antichristo interficiendos. 5. per duos testes in Apocalypsi, intelligi Vetus & Nouum Testamentum. 6. Beatam Virginem MARIAM ita perfundi gaudio cœlesti, ut de nobis non possit cogitare. 7. Vnumquemque debere super certâ suâ scientiâ fundamentum fidei collocare. 8. Si Conciliū generale conuocandum esset, excludi debere

bere Iesuitas & Puritanos. De his nouis, & vix vnquam auditis Paradoxis, breuiter agendum est hoc ordine.

1. *De Vicario Christi.*
2. *De Vicario Dei.*
3. *De Henoch & Helia, an sint in cælo?*
4. *De Henoch & Helia an sint interficiēdi?*
5. *De duobus testibus. Apoc. 11.*
6. *De Beata Virgine Maria.*
7. *De fundamento Fidei.*
8. *De concilio generali conuocando.*

CAPVT I.

De Vicario Christi.

1. **C**HRIſTVM eſſe Monarcham & ſupremum caput Eccleſiæ, fatetur Rex. Et rectè. Nam ſcriptura aperte id docet. Ephes. 1. 23. *Ipfum dedit caput ſupra omnem Eccleſiam.* Et Ephes. 5. 23. *Vir caput eſt mulieris: ſicut Chriſtus caput eſt Eccleſiæ.* Et Coloſſ. 1. 18 *Ipfè eſt caput corporis Eccleſiæ.* Et alibi ſæpius.

2. Quæſtio eſt, an habeat aliquem Vicarium, qui illius vices in Eccleſiæ regimine ſuppleat? Catholici docent, Pe-

trum & successores eius id præstare. LUTHERANI & CALVINISTÆ negant, quia alioqui sequeretur, inquiunt, Ecclesiam habere duo capita, nempe CHRISTVM & Pontificem : ac proinde monstrosam esse. REX ANGLIÆ, in monitoria præfatione, vtrisque se opponit. Vult quidē aliquem esse Vicarium CHRISTI in Ecclesia, quod est contra Lutheranos & Calvinistas : non tamen esse Petrum cum suis successoribus, quod est contra Catholicos : sed esse Spiritum sanctum, quod est nouum commentum.

3. Hic primum quæro, propriè an impropriè loquatur Rex, cum hoc ait? Si propriè, errat; si impropriè decipit. Vtrumque ostendo. Et incipio à posteriori. Nam si impropriè loquitur, erit hic sensus; *Petrus non est impropriè Vicarius CHRISTI: Spiritus sanctus est impropriè Vicarius CHRISTI.* At hoc non venit in controuersiam inter nos & aduersarios. De Vicario propriè dicto, vtrinque disputamus. Igitur rex, qui relicto statu controuersia, aliud respondet, quam quod in quæstione est, non syncerè agit cum Lectore, sed fallit ac decipit.

Si

4. Si autem propriè loquitur, erit hic sensus; *Petrus propriè non est Vicarius Christi: Spiritus sanctus propriè est Vicarius Christi.* At hic duplex error est. Alter de Petro, quem alio loco refutabimus: alter de Spiritu sancto, qui hoc vno argumento refelli potest. Vicarius propriè loquendo, minor seu inferior est eo, cuius est Vicarius: si ergo Rex dicit, spiritum sanctum esse propriè Vicarium Christi, necesse est eum dicere, spiritum sanctum esse minorem Christo. Hæc autem est hæresis Macedoniana. Rex ergo hæreticus est, si hoc dicit. Quod autem Vicarius propriè loquendo, minor sit eo, cuius est Vicarius, certum est ex communi hominum usu & conceptu, non solum apud Catholicos, sed etiam apud aduersarios. Nam quando Calvinus ait, *Christum esse vicariū Dei patris:* Calvinistæ interpretantur hoc de Christo secundum humanitatem, non autem secundum diuinitatem. Et quare obsecro? Ne cogantur concedere, Christum secundum diuinitatem minorem esse Patri, quæ est hæresis Ariana. Supponunt ergo Vicarium propriè loquendo, minorem esse eo, cuius est Vicarius. Vide Con-

radum Vorstium Caluinistam in sua Apologia disp. 2. §. 57.

5. Addam duo dilemmata. *Vnum*; Vel Spiritus sanctus est propriè Vicarius CHRISTI secundum humanitatem, vel secundum diuinitatem. Si prius, sequitur Spiritum sanctum esse minorem CHRISTO homine, quod est valdè absurdum. Si posterius, sequitur CHRISTVM secundum diuinitatem esse caput Ecclesiæ, quod etiam absurdum est. Nam quatenus est caput Ecclesiæ, non habet regnum temporale, vt fatetur Rex Angliæ, ex illo Ioan. 18. 36. *Regnum meum non est de hoc mundo.* Habet autem regnum temporale, quatenus est DEVS: Ergo quatenus DEVS est, non est caput Ecclesiæ. Vnde Augustinus l. 1. Trinit. cap. 12. *Christus secundum formam Dei, primogenitus omnis creaturæ: secundum formam serui, caput corporis Ecclesiæ.*

6. ALTERVM: Vel Spiritus sanctus est propriè Vicarius CHRISTI in externo regimine Ecclesiæ, vel in interno. Non prius, quia non apparet fidelibus in externa & visibili specie: nec facit ea visibilibus, quæ fecit CHRISTVS in mortali
carno.

carne. Non n. administrat Sacramenta: non habet conciones in publico; non increpat subditos delinquentes. Nec posterius, quia licet hæc omnia faciat occulta quadam vi, nempe per internam illuminationem, sanctificationem & increpationem: id tamen non sufficit, vt propterea dicatur esse propriè Vicarius Christi. PRIMO, quia etiam in Veteri Testamento illuminabat Prophetas, sanctificabat Patriarchas, increpabat peccatores: Et tamen non erat tunc propriè Vicarius Christi. SECUNDO, quia is propriè censetur fungi officio Vicarii, qui præstat ea nomine Principis, quæ à Principe, cum præsens est, præstari solent. At Christus, cum præsens erat, visibiliter administrabat Ecclesiam: Ergo Spiritus sanctus, qui hoc non facit, non est propriè Vicarius Christi. TERTIO, quia illuminatio, sanctificatio, & increpatio, cum sint opera Trinitatis ad extra (vt loquuntur Theologi) non magis conueniunt Spiritui sancto, quam aliis personis: Ergo nulla causa est, cur in huiusmodi operibus, Spiritus sanctus sit potius Vicarius

rius

rius Filii, quam Pater, aut Filius sit vicarius Spiritus sancti.

7. DICET fortè Rex, ista opera esse quidem toti Trinitati communia; sed tamen per quandam accommodationem tribui Spiritui sancto, iuxta illud tritum axioma: *Potentia Patri, Sapientia Filio, Sanctificatio Spiritui Sancto appropriatur*. At hæc responsio seipsam destruit. Nam illuminatione propriè pertinet ad Sapientiam. Si ergo Sapientia Filio accommodatur, ut in responsione dicitur: necesse est, illuminationem quoq; Filio accommodari, quod eidem responsioni repugnat. Et sic sola sanctificatio erit propria Spiritui sancto. At hinc ulterius sequitur, Spiritum sanctum non esse Vicariū Christi in sanctificando. Si enim sanctificare est proprium Spiritus sancti, iam in eo opere nō agit vices alterius, sed suas. Quomodo ergo alterius Vicarius dici potest? Aut si potest, cur non similiter Pater est Vicarius aliarum Personarum in creando, & Filius in illuminando?

3. Nec video, quid pro Rege adferri possit, nisi forte illud Ioan. 15.26. *Cum venerit Paracletus, quem ego mittam vobis à Patre,*

tre. Hinc enim videtur colligi, Spiritum sanctum missum esse à Christo, vt vicarius ei esset. At non rectè inde colligitur. Non enim à solo Filio, sed à Patre quoq; missus est, iuxta illud Ioan. 14. 26. *Paracletus autem Spiritus sanctus, quem mittet Pater, in nomine meo, ille vos docebit omnia.* Si ergo propter missionem à Filio, dicendus esset Vicarius Filii; cur non similiter propter missionem à Patre dici posset Vicarius Patris? quod tamen Rex non vult.

9. Occurri potest, non ideò præcisè Vicarium appellari, quia mittitur: sed quia mittitur, vt suppleat locum mittentis. Tametsi ergò mittatur à Patre & filio, non tamen vtriusq; appellari Vicarium, sed solius Filii, quia non mittitur, vt suppleat locum vtriusq;, sed solius Filii. At hoc iam refutatum est. Ostendi enim, nec in externo, nec in interno regimine, propriè supplere illius locum. Si ergo nec ratione missionis, nec ratione officii, potest appellari Vicarius Christi: nulla ratione appellari ita potest. Et hoc ipsum est, quod contendimus.

10. Loquor autem propriè. Negari enim non potest, Spiritum S. impropriè saltem vocari

vocari aliquo modo posse Christi Vicarium, quia post mortem & discessum Christi, multa per inspirationem docuit Apostolos, quæ Christus volebat eos scire. Et hoc sensu dixit Tertullian. in lib. de præscriptionib. c. 13. *Regula fidei est, Christum in cælos receptum sedere ad dextram Patris: misisse vicariam vim Spiritus S. qui credentes agat.*

CAPVT II.

De Vicario Dei.

1. **R**EX Angliæ, sicut ait Spiritum sanctum esse Vicarium CHRISTI in Ecclesia, non tamen in politia temporali, quam CHRISTVS non habuit; sic vult vnumquemq; Regem in suo regno, Vicarium esse DEI, non modo in temporalibus, sed etiam in Ecclesiasticis; & quidem suprâ Episcopos & Pontifices. Hinc in sua monitoria præfatione ait: *Nostrum est providere, qui in terris Dei vicarij sumus. Itemque; Nam neq; me Pontifice vlla ex parte inferiorem esse credo, pace illius dixerim.*

2. Vnde sequitur, duos esse Vicarios in Anglia, nempe Spiritum sanctum & Iacobum

bum Regem: hunc quidem DEI: illum autem CHRISTI: alterum in sæcularibus & Ecclesiasticis simul: alterum in solis Ecclesiasticis. Quod dupliciter refelli potest. PRIMO, Quia inde efficitur, Regem Angliæ maiorem esse Spiritu sancto, ratione officii. Hoc sic ostendo. Qui est Vicarius DEI in sæcularibus & Ecclesiasticis simul, maior est eo, qui est in solis Ecclesiasticis. At Rex dicit, se in vtroque genere esse Vicarium DEI: & Spiritum sanctum in altero tantum esse Vicarium CHRISTI: Ergo in officio Vicarii, facit se maiorem Spiritu sancto.

3. SECUNDO: Si Rex in Primatu Ecclesiæ supra Apostolos & Episcopos ponendus est, quæro, quem ordinem & locum in hierarchia ecclesiastica sortiri debeat? An immediatè post CHRISTVM? At sic esset supra Spiritum sanctum, quem Christi Vicarium esse vult. An potius post Spiritum sanctum, & tamen supra Apostolos & eorum successores, ita vt medius inter hos & illum sit? At Spiritus sanctus immediatè docet Apostolos, & illis immediatè promissus est, vt fatetur Rex his verbis: *Nec Christus, antequam in cælum ascenderet,*
polli-

pollicitus est, se Petrum, qui Apostolos dirigeret ac doceret, relicturum; sed Spiritum sanctum se in eum finem missurum esse prädixit.

CAPVT III.

De Henoch & Helia, an sint in cœlo?

1. **R** Ex docet Henoch & Heliam per multa annorum millia fuisse in cœlo cum corporibus glorificatis. Sic enim ait; *Vt autem illi (Hench & Helias) qui tot millia annorum cœli fuerunt incolæ, mortalitatis legibus soluti redeant in hanc vitam, sicut commentitium est figmentum, ita naturæ planè repugnat sanctificatorum corporum.* Vnde sequitur, si tot annorum millia fuerunt in cœlo, & cœlesti beatitudine: fuisse ibi ante Christi mortem & ascensionem. At hoc falsum planè est, & apertè contra Scripturam: quod tripliciter ostendo.

2. **PRIMO:** Scriptura docet, cœlum mansisse clausum toto tempore Veteris Testamenti, vsque ad Christi passionem. Hebr. 9. 6. *In priori tabernaculo semper in-*
troi-

troibant Sacerdotes, sacrificiorum officia consummantes: in secundo autem semel in anno solus Pontifex, non sine sanguine, quem offert pro sua & populi ignorantia. Hoc significante Spiritu sancto, nondum propalatam esse sanctorum viam, adhuc priori tabernaculo habentestatum; id est, Quod in Veteri Testamento non liceret sacerdotibus ingredi sancta sanctorum; per hoc significabat Spiritus sanctus, viam cœlorum nondum fuisse tunc apertam & patefactam. Simile est illud Hebr. 10. 19. *Habentes itaque fratres fiduciam in introitu sanctorum in sanguine Christi, quam initiauit nobis viam nouam & viuentem per velamen, id est, carnem suam.* Quid clarius? At CHRISTVM suo sanguine parasse nobis viam nouam ad cœlum, quod antea adiri non poterat. Ad quod attendens D. Hieronymus in epist. ad Dardanum, sic scribit; *Sanguis Christi, clavis paradisi est.* Ex his ita concludo; Toto tempore Veteris Testamenti vsque ad mortem Christi clausum & inaccessible fuit cœlum propter peccatum Adami: Ergo illo tempore, Henoch & Helias ingressi non sunt.

3. SECUNDO; non solum constat ex

scriptura, cœlum fuisse clausum vsq; ad mortem CHRISTI, vt iam dictum est; sed etiam CHRISTVM fuisse primum, qui illud ingressus est. Hebr. 6. 26. *Vsq; ad interiora velaminis, ubi præcursor pro nobis introiit Iesus.* Hic dicitur CHRISTVS intrasse interiora velaminis, id est, cœlum, tanquam præcursor reliquorum omnium. At non fuisset præcursor, si Henoch & Helias ante illum intrassent.

4. TERTIO; Ex scriptura constat, omnibus semel moriendum esse, iuxta illud Hebr. 9. 27. *Statutum est hominibus semel mori.* Et Ps. 88. 49. *Quis est homo, qui viuet, & non videbit mortem?* q. d. Nemo. At Henoch & Helias nondum mortui sunt. Ergo adhuc moriendum illis est: Ergo non sunt in cœlo cum glorioso & immortali corpore. Maior negari non potest. Minorem concedit Rex. Et meritò. Nam de Henoch fateretur Apostolus Heb. 11. 5. cum ait: *Henoch translatus est, ne videret mortem.* De Helia satis constat, quia viuus à conspectu Helisei in curru sublatus est per aërem, cum simul ambo sermocinarentur. 4. Reg. 2. 11.

5. Nec habet Rex quicquam pro nouo
suo

suo Paradoxo, nisi fortasse illud Ecclesiastici 44. 16. *Henoch placuit Deo & translatus est in paradysum.* Et illud 4. Regum 2. 12. *Ascendit Helias per turbinem in cælum.* Ex quibus locis videtur colligi, ambos in cælum Empyreum translatos esse. At certè id non colligitur. Nam illud: *Translatus est in paradysum*; potest explicari, vel de paradiso terrestri, in quo fuit Adam; vel de quouis alio amœno loco, qui nomine Paradisi in Scriptura significari solet. Similiter illud: *Ascendit per turbinem in cælum*: rectissimè de cælo aërio accipitur, sicut & illud Psal. 8. 9. *Volucres cæli, & pisces maris.* Non ergo magis conuinci potest Heliam, quàm volucres, esse in cælo beatorum.

6. In quem ergo locum translati sunt, inquires, si non in cælum beatorum? Aliqui existimant in paradysum terrestrem, ex quo Adam expulsus est, vt D. Thomas 3. p. q. 49. art. 5. ad 2. vbi ait: *Henoch raptus est in paradysum terrestrem, vbi cum Helia simul creditur viuere, usq; ad aduentum Christi.* Alii, quia putant paradysum illum, tempore diluuii, fuisse aquis obrutum & destructum; dicunt eos in alio quodam

amœno locoverfari. Nihil certi est, niſi quod in cœlo beatorum non ſint. Nec mirum eſt, nos hoc ignorare. Multa alia ignoramus. Neque nos ſoli. An non fatetur Apoſtolus de ſeipſo, nescire ſe, in corpore, an extra corpus, raptus fuerit in paradifum? An non teſtatur Scriptura, neminem vnquam cognouiſſe, quo loco ſepultus ſit Moyſes? An non Diuus Auguſtinus l. 2. de peccato Originali cap. 23 proponit varias quæſtiones, quas ait à nobis certo definiri non poſſe? Inter quas etiam eſt illa, de qua nunc agimus, *ubi locorum ſint Henoch & Helias?* itemq; illa, *Vbi fuerit Mathuſalem tempore diluvij: cùm conſtet non fuiſſe in arca Noe?* Et ſanè dicant, qui omnia ſcire ſe arbitrantur, ſi Helias raptus fuit in cœlum beatorum, ut ipſi volunt; quis fuerit baiulus litterarum, quas, poſtquam raptus eſt, ſcripſit ad Regem Iuda? ubi chartam & atramentum naſtus ſit? an currus & equi, quibus eò vectus eſt, adhuc mancant in cœlo? & quo pabulo ibiveſcantur?

7. At obiici poteſt: Si duo illi viri, Henoch & Helias, non ſunt in cœlo cum corpore immortalī: neceſſe eſt eos alibi

viue-

viuere in corpore mortali. Si ita est, sine cibo & potu esse non possunt. Quomodo ergò sustentantur? Diu. Augustinus lib. 1. de peccatorum meritis & remis. cap. 3. insinuat tres solutiones. PRIMA est, si potuit DEVS efficere, vt Israelitarum vestes & calceamenta per 40. annos non fuerint attrita in deserto; cur nequeat efficere, vt amici ipsius conseruentur ab interitu, sine cibo & potu? Altera, si Helias per 40. dies potuit ambulare sine nutrimento, ante raptum; cur non per totidem annos & sæcula, postquam raptus est? Tertia, si Adam in paradiso fuisset conseruatus ex ligno vitæ, nisi peccasset; cur non Henoch & Helias, qui putantur esse in eodem loco, & vesci de eodem ligno?

CAPVT IV.

*An Henoch & Helias sint
interficiendi ab Anti-
christo?*

1. **R** Exait se non habere pro Christianis eos, qui credunt Henoch &

Heliam verè interficiendos esse ab Antichristo. *Hoc, inquit, qui credat, (DEVM testor) non modo pro magni nominis Theologo, sed nepro Christiano quidem habeam.* At hoc credunt antiqui Patres. An igitur pro Christianis habendi non sunt? Nimis rigida hæc censura est. Si diceret, se non credere, Henoch & Heliam interficiendos esse ab Antichristo; esset aliquo modo tolerabile. At dicere, non habendos pro Christianis, qui id credunt; quid aliud est, quàm affirmare, habendos esse pro Ethnicis & infidelibus?

2. Sanè antiqui Patres, qui id credunt, meliori fundamento nixi sunt, quàm Rex, qui id negat. Nam hic non alio niri potest, quàm quod putet Henoch & Heliam esse in cælo beatorum cum corpore glorioso & immortali. Inde enim sequitur, non amplius mori aut interfici posse. At hoc fundamentum apertè falsum est, vt paulò antè ex Scriptura ostendi. PATRES verò, qui contrarium sentiunt, fundantur in illo Apocalypf. II. 3. *Dabo duobus testibus meis, & prophetabunt diebus mille ducentis sexaginta, amicti saccis.* Et infra; *Et cum finierint testimonium suum,*
bestia

bestia quæ ascendit de abyſſo, faciet aduerſus eos bellum, & vincet illos, & occidet eos. Et corpora eorum iacebunt in plateis ciuitatis magnæ, quæ vocatur ſpiritualiter Sodoma & Aegyptus, ubi & Dominus eorum crucifixus eſt. Et infra: Et poſt tres dies & dimidium, ſpiritus vitæ à DEO intrauit in eos & ſteterunt ſuper pedes ſuos, &c. Ex quibus verbis tria colligi poſſunt. 1. Tempore Antichriſti venturos duos teſtes, qui amiſti ſaccis, Chriſti fidem & doctrinam publicè profiteantur. 2. Eos hoc nomine ab Antichriſto interficiendos. 3. Poſt tres dies & dimidium reuocandos ad vitam, & in cœlum aſcenſuros.

3. Quod autem hi duo teſtes futuri ſint Henoch & Helias, probant Patres ex antiqua traditione, & variis Scripturæ testimoniis. Et loquuntur de hac re, tanquam certa & explorata. Arethas in illum locū ſic ſcribit. *Fertur ex traditione Preconum Chriſti, quod inuariabiliter in Eccleſia recipitur, ipſum quoq; Henoch venturum cum Helia Theſbite. Venient enim ambo, ut proteſtentur ijs, qui tunc erunt, ne fallacibus Antichriſti ſignis fidem adhibeant.* Et Tertullianus in lib. de anima. cap. 28. *Translatus eſt Henoch*

& Helias, nec mors eorum reperta est, dilata scilicet. Caterum morituri reseruantur, ut Antichristum sanguine suo extinguant. Et Diu. Ambrosius; in 1. Cor. 4. Henoch & Helias ultimo tempore futuri sunt Apostoli. Mittienim habent ante CHRISTVM ad preparandum populum DEI, & muniendas omnes Ecclesias ad resistendum Antichristo: quos & persecutiones pati, & occidi, lectio Apocalypsis testatur. Et D. Hieronymus in Epist. 148. ad Marcellam: De Henoch autem & Helia, quos venturos Apocalypsis refert, & esse morituros, non est istius temporis disputatio. Et D. Augustinus lib. 20 de Ciuitate DEI. cap. 29. Per hunc Heliam magnum mirabilemque Prophetam, ultimo tempore, Iudeos in Christum credituros esse, celeberrimum est in sermonibus cordibusque fidelium Vocat fideles: & Rex non habeat eos pro Christianis? Similia scribunt Gregorius, Prosper, Isidorus, & alii.

4. Nunc quæro, si omnes hi Patres, & quoque eorum sententiam secuti sunt, non fuerunt Christiani, ut Rex vult: quoniam ergo fuerunt Christiani eo tempore, quo illi vixerunt? Vel aliqui, vel nulli, necesse est. Si nulli, nulla fuit Ecclesia

CHRISTIANI

CHRISTI. Vnde ergo nos nati & educati in CHRISTO sumus? Si aliqui, qui nam illi fuerunt, si prædicti Patres non fuerunt?

5. OBIICIET Rex, non omnes antiquos Patres ita sensisse. Aliquos per duos illos testes intellexisse Heliam & Ieremiam; nonnullos Heliam & Mosen. Fateor. Sed non iuvat hoc causam Regis. *Primò*, quia Patres, qui nobiscum sentiunt, multò plures sunt, & maiorem auctoritatem habent. Eos autem damnare, & nolle pro Christianis agnoscere, magna temeritas est. *Secundò*, quia reliqui, qui paucissimi sunt, non damnant horum sententiam, ut Rex facit: sed solum putant suam esse probabiliorē. *Tertiò*, illi ipsi, qui aliter sentiunt, tametsi negent Henoch, aiunt tamen Heliam interficiendum esse. Ergo saltem ex ea parte, non minus, quam alii, damnantur à Rege, & pro Christianis haberi non possunt. An igitur omnes pro Ethnicis censerī debēt, & solus Rex Christianus est?

6. Sed video, quid respondeat. Nimirum se, cū dixit pro Christianis haberi non posse, qui credunt Henoch & Heli-

am interficiendos ab Antichristo: de iis tantum intellexisse, qui hoc tempore viuunt: non de antiquis Patribus: Eos, tametsi in eodem errore fuerint, excusari posse per ignorantiam. Sic enim habet: *Sed nimis anxie studiosęq; hanc futilem & sanę anilem fabulam* (nempe de Henoch & Helia interficiendis) *refutaui, cui tantum abest, ut credam: ut contra, isto tam erudito seculo, hoc qui credat* (DEVM testor) *non modo pro magni nominis Theologo, sed ne pro Christiano quidem habeam. Veteribus autem Theologis, si qui in hac parte errauerint, aequior sum, propter rationem, quam supra memorauit.* Est autem hæc ratio, quam supra memorauerat: *Mirum non est, si sapius Patres hic errent, & minus recte multa Apocalypsis mysteria intelligant, propterea quod liber ille eorum temporibus adhuc obsignatus fuit: & licet mysterium iniquitatis iam tum ageretur, ille tamen homo peccati nondum erat reuelatus. In omnibus enim obscuris prophetiis certissima est regula, nunquam eas satis intelligi posse, usque dum compleantur.*

7. Igitur Rex ita sentit. I. Prophetias non posse intelligi, nisi quando completæ sunt.

tæ sunt. 2. Prophetiam Apocalypsis de Antichristo & duobus testibus, non fuisse completã eo tempore, quo vixerunt antiqui Patres: ac proinde non mirũ esse, si ab eis intellecta non fuerit: Et hoc modo errorem eorum excusari posse. 3. Eandem Prophetiam hoc tempore completã esse: nunc enim venisse Antichristũ, & manifestum esse, quod sit Pontifex Romanus; & tamen nusquam apparere Henoch & Heliam: ideoque anilem fabulam esse, quicquid antiqui Patres de Henoch & Helia commenti sunt. 4. Qui hoc tempore, in tam clara luce, adhuc credunt venturos Henoch & Heliã, non posse haberi pro Christianis: multò minus pro Theologis. Hæc summa est.

8. SED primũ quæro, quis Regem Angliæ constituerit Iudicem suprã antiquos & recentes Theologos in causã fidei ac religionis? Laici de eiusmodi rebus iudicare non debent, sed Episcopi, vt supra ostensum. Deinde Iudicium hoc, non modo vsurpatum, sed etiam temerarium est. Omnes enim Theologi, quotquot nunc sunt, & olim fuerunt, eo manifestè damnantur. Veteres quidem erroris: mo-

moderni autem impietatis. Solus Rex cum suo Sacellano innocens est. Solus ipse, nec errauit cum antiquis Patribus; nec cum modernis Theologis Christiano nomine indignus est. Deniq; quis spiritus reuelauit Regi, prophetiam Apocalypsis iam completam esse? aut vnde illi constat, venisse iam pridem Antichristum, & sub nomine Romani Pontificis, orbi Christiano dominari? Hæc noua portenta sunt: sæpe quidem audita: sed accurate à nostris refutata.

CAPVT V.

De duobus testibus, Apoc. II.

I. **R**EX Angliæ, vt ostensum est, damnat eos, qui per duos testes, quorum fit mentio in Apocalypsi, putant intelligendos esse Henoch & Heliam: & eorum sententiam non aliter, quam *Iudaicam & anilem fabulam, aut otiosum somnium* interpretatur. Quid ergo ipse sentit? Audite Regis sapientiam. *Iam, inquit, illa anili fabula refutata de duobus illis testibus Henoch atque Helia, restat, vt meam coniecturam interponam, doceamq; quosnam illos testes esse*
arbi-

arbitrer. Arrigite aures, populi. Rex Angliæ mira dicturus est. Interponet suam, non sententiam, sed coniecturam. Non enim inter Patres & Episcopos, qui in Conciliis rem definire solent: sed inter Mathematicos seu coniectores videtur censerī velle. Audite ergo, quid coniectet. *Per duos, inquit, hosce testes, intelliguntur Vetus ac Nouum Testamentum.* Hoc sic probat: illi duo testes interficiendi sunt ab Antichristo, & postea iterum à Deo resuscitandi; atqui sacra scriptura Veteris ac Noui Testamenti à Pontifice fuit corrupta, neglecta, & quodammodo interfecta; & postea à LVTHERO & CALVINO fuit iterum in pristinum honorem restitutâ. Ergo coniectura Regis Angliæ verissima est. Magnum, si diis placet, argumentum.

2. Dicam, quod res est. Tota hæc Regis interpretatio merito suspecta esse debet. 1. quia noua & hætenus inaudita est. 2. quia nititur mera coniectura, & quidem vnius tantum hominis. Nisi forte Sacellanus coniecturæ socius sit. 3. quia non potest esse à Spiritu sancto. 4. quia corrumpit sacram scripturam; imo interficit.

Hinc

Hinc sumo quatuor argumenta. *Primum* est. Omnis noua doctrina, quæ nunquam antea tradita est, & communi antiquorum Patrum consensui repugnat, meritò suspecta esse debet apud fideles : atqui doctrina Regis de duobus testibus est planè noua, nunquam antea tradita, & communi antiquorum Patrum consensui repugnat : Ergo meritò suspecta esse debet apud fideles. Et hic habet locum Illud D. Hieronymi in epistola ad Pammachium & Oceanum; *Quisquis assertor es nouorum dogmatum, queso te, ut parcas humanis auribus; parcas fidei, quæ apostolico ore laudata est. Cur post quadringentos annos (dicam ego, post mille sexcentos) docere nos niteris, quod ante nesciuimus? usq; in hanc diem, sine vestra ista doctrina Christianus mundus fuit.*

3. *Alterum.* Illa doctrina, quæ nititur merâ coniecturâ, & quidem vnius tantû hominis, non debet anteponi doctrinæ plurimorum Patrum, quæ iam pridem à Christianis recepta est : Atqui doctrina Regis de duobus testibus, id est, duobus Testamentis, nititur merâ coniecturâ, & quidem solius Regis (aut forte Sacellani) doctri-

doctrina autem Patrum de Henoch & Helia, vel saltem de Mose & Helia, iam pridem recepta est à Christianis : Ergo huic altera anteponi non debet. Porro in scripturis inuenio duplices coniectores: quorum alii à spiritu sancto; alii ab alio spiritu instructi, diuinare seu coniectare solent. Prioris generis fuerunt Ioseph, & Daniel. Gen. 40. 22. & Dan. 2. 24. Posterioris, arioli, magi, & malefici apud Chaldæos, Dan. 2. 2. Si constaret Regem Angliæ coniectorem esse prioris generis, par illi fides haberetur, quæ olim Iosepho & Danieli. At nondum hoc constat.

4. *Tertium.* Illa doctrina non potest esse à spiritu sancto, quæ ex mera vnius hominis pendet coniecturâ. Atqui doctrina Regis pendet ex merâ vnius hominis cōiecturâ, vt ipse fatetur : Non ergo potest esse à spiritu sancto. Maiorem sic explico. Duplex potest esse coniectura, seu inspiratio, vt dictum est : Vna à spiritu sancto; altera aliunde. Prior semper est vera, certa, indubitata; posterior sæpe falsa, incerta, lubrica. Prior tribuitur soli Deo, aut spiritui sancto, non autem homini; poste-

posterior contra, homini, non Deo tribuitur. Hoc patet ex scriptura. Nam Ioseph, Daniel, & alii prophetæ diuini, quotiescunq; ex Dei inspiratione aliquid locuti sunt, aut reuelarunt: à Deo se habere professi sunt Gen. 40. 8. *Qui dixerunt, Somnium vidimus, & non est, qui interpretatur nobis. Dixitque ad eos Ioseph; Nunquid non Dei est interpretatio? referte mihi, quid videritis.* Et Gen. 41. 15. *Cui ille ait. Vidi somnia, nec est, qui edisserat: quæ audiri te sapientissimè coniicere.* Respondit Ioseph: *Absque me, Deus respondebit prospera Pharaoni.* Et Dan. 2. 27. *Respondens Daniel coram Rege ait: Mystrium, quod Rex interrogat, sapientes, magi, arioli, & aruspices nequeunt indicare Regi, Sed est Deus in cælo reuelans mysteria qui indicauit tibi Rex Nabuchodonosor, quæ ventura sunt in nouissimis temporib.* Et generatim loquendo, omnes prophetæ soliti sunt dicere: *Verbum Domini quod locutus est per os meum.* Longè aliter Rex Angliæ. Non ait se loqui verbum Dei, nec coniecturam suam à Spiritu sancto esse contendit, sed ingenuè fateretur, quod res est, sui capitis coniecturam esse, ideoq; non certam, sed tantum probabilem haberi

berivult. Sic enim loquitur: *Restat ut meam coniecturam interponam.* Et paulo post: *proponam probabiles coniecturas.* Concludo igitur coniecturam Regis non esse à spiritu sancto; sed aliunde.

5. *Quartum.* Is censetur corrumpere & occidere sacram scripturam, qui eam alio spiritu interpretatur, quam quo inspirata est: At Rex Angliæ interpretatur scripturam Apocalypsis ex merâ suâ coniecturâ: Ergo interpretatur alio spiritu, quam quo inspirata est. Minor patet est dictis. Maior nititur tribus principiis. *Primum* est, quod sacra scriptura à spiritu sancto dictata & inspirata sit. 1. Timoth. 3. 16. *Alterum*, quod eodem spiritu, quo dictata & inspirata est, debeat intelligi seu explicari, & non alio. *Tertium*, quod Vita scripturæ consistat, non in cortice verborum, sed in vero & germano ipsius sensu. Igitur, qui vero sensu neglecto, alium querit, censetur vitam auferre, quod est, Scripturam interficere. At qui illam interpretatur ex mera hominis coniectura, & non ex Spiritu sancto, is neglecto vero sensu, alium quærit: Ergo censetur vitam auferre, seu interficere. Hoc autem fa-

cere Regem Angliæ, satis iam ostensum est

6. Præter hæc 4. argumenta, adhuc vnum addo ex concessione Regis in hunc modum; Concedit Rex, vt supra visum est, hæc propositionem; *Quamdiu prophetia Apocalypsis de Antichristo & duobus testibus ab eo interficiendis, fuit obsignata, & nondum opere completa: non est mirum, si Patres errarint in eius intelligentia & explicatione. At nunc postquam completa est, adeo planam, facilem, & certam habet intelligentiam, vt qui adhuc dubitet pro Christiano haberi non possit.* Iam subsumo. Atqui ipsemet Rex, post completam prophetiam (vt ipse quidem vult) adhuc dubitat de tota re: Ergo Rex, suo iudicio, pro Christiano haberi non potest. Minorem probo, quia per solam coniecturam probabilem colligit, nomine duorum testium intelligi oportere Vetus & Nouum Testamentum. Hæc autem coniectura non facit rem certam & exploratam. De Antichristo verò sic loquitur; *Sanè, quod ad definitionem Antichristi, nolo rem tam obscuram & inuolutam, tanquam omnibus Christianis ad credendum necessariam urgere.* Hic disertè fate-
tur,

tur, esse rem adhuc obscuram & inuolutam. Quomodo ergo paulo ante dixit, prophetiam de Antichristo completam esse, & adeo certam, ut hoc erudito sæculo dubitare nemo possit? Hæc non cohærent. Mitto alia absurda, quæ in Regis interpretatione passim occurrunt.

CAPVT VI.

De Beata Maria Virgine.

1. **R**Ex in præfatione monitoria, partim benè, partim malè sentit de B. Virgine MARIA. Benè quidem, cum fatetur veram esse Dei matrem, & supra omnes beatorum hominum ac spirituum ordines ad cœlestem gloriam elatam, excepto CHRISTO. Malè verò, cum addit, eam se nostris rebus ac negotiis non immiscere, neque ad nostras preces attendere, eo quod tota gaudio cœlesti perfusa sit. *In cœlis, inquit, in æterno sanctarum animarum receptaculo, in æternâ est felicitatē collocata, nunquā à tantis gaudiis vlla terrenarum rerum cura aut solitudine auocanda.* Vis argumēti

videtur esse huiusmodi; Qui in æterna felicitate ac gaudio collocati sunt, non possunt inde auocari, & nostris orationibus attendere: At B. Virgo in æterna felicitate & gaudio collocata est: Ergo non potest inde auocari, & nostris orationibus attendere.

2. Ut verum fatear, nouus hic error est. Lutherani & Calvinistæ, qui hætenus negarunt Sanctorum inuocationem, eo fundamento nixi potissimum sunt, quod putarent, Sanctos ignorare, quæ apud nos fiunt. Rex alio nititur. Ait, propter nimium gaudium, quò repleti sunt, non posse attendere ad ea, quæ petimus. Qui error, multo, quàm Lutheranorum & Calvinistarum, grauior est. Nam inde sequitur, nec CHRISTVM Mediatorem Dei & hominum, nec Angelos custodes posse attendere ad ea, quæ circa nos sunt: imo CHRISTVM minus, quàm Angelos posse id præstare: quæ ingens blasphemia est. Hoc autem sequi, sic ostendo; Qui in æterna felicitate & gaudio collocati sunt, non possunt nostris rebus ac negotiis attendere, vt vult Rex: Atqui CHRISTVS secundum humanitatem, &

Ange-

Angeli custodes, sunt in æterna fælicitate & gaudio collocati, quod nemo negaverit: Ergo CHRISTVS & Angeli non possunt nostris rebus & negotiis attendere. Rursum; si gaudium cœleste obstat, quo minus beati possint ad res nostras attendere, sanè, quo quis maiori gaudio perfusus est, eo minus poterit attendere. At CHRISTVS secundum humanitatem maiori gaudio perfusus est, quam Angeli: Ergo minus potest ad res nostras attendere, quàm Angeli. Quæ hæc portenta sunt?

3. Hinc satis, opinor, patet, quam vim habeat argumentum Regis. Quasi verò CHRISTVS, B. VIRGO & Angeli custodes, aliiq; Sancti in cœlo, non possint attendere nostris rebus, nisi à cœlesti gaudio auocentur. Vtrunq; præstare possunt, & frui cœlesti gloria, & simul res nostras procurare. Nec pugnant inter se, beatum esse, & aliorum curam suscipere. Alioqui; quomodo DEVS ipse, qui omnium rerum, etiam minimarum, diligentissimam curam habet, beatus esse possit? Quomodo CHRISTVS, qui teste Apo-

stolo, *quotidie interpellat pro nobis, pleno gaudio perfrueretur?*

4. *Addit Rex, Inuocationem Sanctorum, inter nouitios, & ante quingentesimum CHRISTI annum in auditos articulos, referendam esse. Itane verò? Quid si ego ostendam, Sanctorum inuocationem maximè floruisse primis quingentis annis? Nec hoc difficile est. Patres, qui illis annis vixerunt, prolixè id testantur. E multis paucos accipe. Gregorius Nazianzenus oratione in Cyprianum sic ait; Tu ab alto nos respice, nostrumq; sermonem ac vitam dirige. Augustinus lib. 7. de baptismo contra Donatistas cap. 1. Adiuuet nos Cyprianus orationibus suis. Athanasius in sermone de Deipara; Inclina aurem tuam in preces nostras, & ne obliuiscaris populi tui. Et infra; Ad te clamamus, recordare nostri sanctissima Virgo. Et iterum: Intercede hera & domina, & regina, & Mater Dei pro nobis. Basilus orat. in quadraginta martyres: Qui aliqua premitur angustia, ad hos confugiat; qui rursus latatur, hos oret: ille, ut à malis liberetur; hic, ut duret in rebus latis. Gregorius Nyssenus orat. in S. Theodorum: Intercede ac deprecare pro patria apud com-*

munem Regem & Dominum. Timemus afflictiones, expectamus pericula, non longe absunt scelesti Schytæ, bellum aduersum nos parturientes: ut miles pugna pro nobis: ut martyr, pro conseruis utere libertate loquendi.

5. Hi Patres (& multi alii, quos recensere promptum est) vixerunt primis quingentis annis in Ecclesia, & titulo sanctitatis ac doctrinæ perspicui sunt. Hi ipsi sanctos in cœlo existentes inuocauerunt. Quomodo ergo audet dicere Rex, Inuocationem sanctorum primis quingentis annis in Ecclesia inauditam esse? Nimium credit suo Sacellano, qui contra conscientiam persuadet illi, quod vult. Optandum esset, ut Rex ipse legeret antiquos Patres, & non pateretur se amplius illudi.

CAPVT VII.

De fundamento Fidei.

1. **R**EX in monitoria præfatione dicit, debere vnumquemq; scrutari scripturas, & super suâ certâ scientiâ fundamentum Fidei collocare. Sic enim loquitur: *Cum Paulo opto, vos omnes fieri*

tales, hac una in re qualis & ego sum: in primis, ut velitis scripturas peruolutare, ex his credendi normam petere, neq̃ super aliorum incertis opinionibus, sed vestra ipsorum certa scientia, fidei fundamenta collocare. Quid hoc aliud est, quàm dicere, debere vnumquemque facere se Iudicem dogmatum fidei: non credere Ecclesiæ vel cuicunq̃; alteri, sed suo proprio iudicio acquiescere?

2. Hæc doctrina omnium perniciosissima est, & non solum repugnat scripturis, Patribus, & communi Christianorum consensui, sed etiam ipsum Regem & antecessores eius sine dubio condemnat. Hanc posteriorem partem sic ostendo. Rex Angliæ & alii Principes Protestantes, vel habent potestatem cogendi suos subditos ad fidem, quam ipsi putant esse veram, vel non habent. Si habent, ergo subditi tenentur illos sequi & obedire: Ergo falsum est, vnumquemque debere super suâ certâ scientiâ fundamentum fidei collocare. Non enim subditi super suâ scientiâ, sed super scientiâ Regum & Principum collocare debent fundamentum fidei, si verum est, Reges & Prin-

Principes habere potestatem, suos subditos ad fidem compellendi. Si autem non habent hanc potestatem, cur eam passim vsurpant? Cur *Elisabetha*, coegit subditos ad Calvinismum? Cur *Iacobus*, interposito iuramento, idem facit? Cur Principes protestantes in Germania eos imitantur? Non enim quærunt ex subditis, quid quisq; ex suâ certâ scientiâ statuât de rebus fidei & religionis; sed ipsi pro suo arbitrio & autoritate, etiam inuitis subditis, & sæpe reclamantibus, sua dogmata, coniecturas, & ceremonias proponunt, imagines confringunt, crucem Christi eliminant: omnia sacra, astante & dolente populo, execrantur.

3. Hinc concludo, Regem Angliæ, vel in doctrina, vel in facto errare. Docet vnumquemque debere collocare fundamentum Fidei super certâ suâ scientiâ. At hoc non permittit suis subditis, vt faciant. Vel ergo hic, vel ibi errat. Ego in utroque illum errare sentio. Nã neq; Rex ipse, neq; subditi debent esse ludices controuersiarum. Quis ergo? Non alius, quam Prælatus Ecclesiæ. Hoc etsi probatum sæpè sit, conabor etiam hic probare.

bare. Nec opus est alio, quam hoc vulgari argumento. Omnes Catholici consentiunt, solum Prælatum Ecclesiasticum esse legitimum Iudicem controuersiarum fidei ac Religionis. Aduersarii autem non possunt inter se conuenire de iudice, quia alii volunt esse spiritum sanctum, alii scripturam, alii internum criterium, alii principem vel magistratum sæcularem, alii vnumquemque priuatum. Ergo potius Catholicis, quàm aduersariis credendum est.

4. Hoc, inquam, argumento satis conuincuntur Aduersarii, nisi valdè impudentes sint. Cum enim videant omnes controuersias, quæ internos Catholicos oriuntur, statim sopiri per magistratum ecclesiasticum, quem omnes, tanquàm legitimum Iudicem agnoscimus: Et è contrario experientia doceat, nullā controuersiam, quæ inter ipsos oritur, finiri posse, quia non possunt conuenire de communi Iudice; quid aliud statuere ac cogitare debent, quàm nos Catholicos meliori conditione esse, qui lites nostras finire possumus; quam ipsos, qui finire non possunt?

CAPVT VIII.

*De Concilio Generali con-
uocando.*

I. **R**Ex in monitoria prætatione dicit,
si Concilium generale indicen-
dum esset, in quo omnes Christiani *ad ali-
quem in religione consensum adduci possent*,
oportere conuocari omnes Christianos
Principes & Ecclesiasticos, *exclusis Iesuitis
& Puritanis*. Hos enim fatetur se odisse;
magis tamen Puritanos, quam Iesuitas.
Quamuis enim isto loco utrosq; coniu-
gat, & communi titulo appellet *monitios
& furiosos incendiarios*; alibi tamen satis
ostendit, se Puritanis infestiores esse,
quam Iesuitis. Sic enim loquitur: *Egòne
Puritanus, qui à Puritanis non solum à Nati-
uitate continuo vexatus fui: verum etiam in
ipso matris utero propemodum extinctus, an-
tequam in lucem editus essem? Ego, qui in meo
ad Filium libro, multo acrius ac vehementius
in Puritanos quam Pontificios inuectus sum?
cui etiam cum secundò ederetur, prolixam in
odium Puritanorum Præfationem Apologeti-
cam præposui?*

2. Igitur

2. Igitur ex mente Regis, hæc tria seruari oportet. *Primo*, vt indicatur Concilium Generale. *Secundo*, vt tractetur de consensu fidei ac religionis. *Tertio*, vt excludantur Iesuitæ & Puritani. Hinc oritur mihi triplex quæstio. Prima, quinam Christiani adfuturi sint in illo generali Concilio, si Iesuitæ & Puritani excludi debeant? Altera, quis futurus Concilii Præses seu Iudex? Tertia, quis consensus in fide & Religione sperari possit? De singulis obiter dicam.

3. Primum ergo quæro, quinam adfuturi sint exclusis, Iesuitis & Puritanis? Ratio dubitandi est, quia si de fide & religione agitur (sicut reuera agitur) omnes Catholici, quotquot per orbem Christianum dispersi sunt, cum Iesuitis in fide & religione consentiunt. Et similiter omnes ubiq; puri Calvinistæ, cum Puritanis. Si ergo Iesuitæ & Puritani, titulo fidei ac religionis excludendi essent; omnes Catholicos & puros Calvinistas eodem tit. excludi oporteret. Faciamus ergo sic esse. Excludantur Pontifex, Imperator, Reges Hispaniæ, Galliæ, Poloniæ, Hungariæ: Archiduces Austriæ, Principes Electores, Mogun-

Moguntinus, Treuirensis, Coloniensis, Palatinus; Duces Bauariæ, Lotharingiæ, Brabantia, Franconia, Italia: Et omnes eorum subditi. His omnibus exclusis, qui tandem sunt, qui Concilio generali interesse possint? Nimirum soli Anabaptistæ, Lutherani, & non puri, seu Anglicani Calvinistæ. At hi omnes, respectu aliorum, quos exclusos vult Rex, pauculi omnino sunt. Quomodo ergo generale Concilium dici poterit, vbi tam paucis præsentibus, maior pars Christiani orbis absutura est?

4. Et quis huic generali (si diis placet) Concilio præsidebit? quis omnium controuersiarum, quæ in disceptationem veniunt, supremus Iudex constituetur? Sine dubio Rex Angliæ, vel Daniæ, vel Princeps aliquis Lutheranus. At non ferent hoc Anabaptistæ, qui omnem magistratum execrantur. Sed nec fieri poterit, vt vnus aliquis sit Iudex omnium. Nam, vt supra dictum est, Rex Angliæ vult vnumquemque debere super certâ suâ scientiâ fundamentum fidei suæ collocare. Singulos ergo, qui in Concilio adfuturi sunt, Iudices esse, necesse est. Singuli

guli super certâ suâ scientiâ, non super alterius iudicio vel arbitrio, fidei ac Religionis fundamentum collocabunt. Et quis tunc consensus sperari poterit?

5. Rem exemplo declarabo. Conuocetur Concilium, quale vult Rex. Adsint Anabaptistæ. Lutherani, & qui in Anglia cum Rege sentiunt. Moueatur controuersia, *An infantes, cum adoleuerint, iterum baptizandi sint?* Affirment Anabaptistæ; negent cæteri. Præses, quisquis futurus est, litem dirimat. Quid facti opus? Audiantur primùm Anabaptistæ. Eorum, sine dubio, vox hæc erit; *Domine Rex: Fundamentum fidei de baptismo infantum, super certâ nostrâ scientiâ collocandum est, ut tu ipse iis. At certò nobis constat, infantes, cum adoleuerint, iterum baptizandos esse. In hac scientia fundamentum fidei nostræ immotum stat. Vos si vultis, aliter sentite & facite; per nos licet.* Quid iam Lutherani cum sociis? Sic illi: *Domine Rex: nostra certa scientia planè contraria est. Scimus infantes, si semel baptismo lustrati sunt, non iterum lustrandos esse. In hoc pedem figimus.* His utrinque auditis concludet Rex: *Vnusquisq;*
abun-